


甲



1

2

三

本紀卷第十

元史十

翰林學士大夫知制誥董修國史長樂瀛翰林待制承直郎同知制誥董國史院編修官呈禕等奉勅修

世祖七

十五年春正月辛卯阿老瓦丁將兵戍幹端給米三千石鈔三十錠以千戶鄭鄴有戰功陞萬戶佩虎符癸巳西京饑發粟一萬石賑之仍諭阿合馬廣貯積以備闕乏順德府總管張文煥太原府達魯花赤太不花以按察司發其姦賊遣人詣省自首反以罪誣按察司御史臺臣奏按察司設果有罪不應因事而

告宜待文煥等事決方聽其訴從之己亥收拾闡遺
官也先闊闊帶等坐易官馬闡遺人畜免其罪以諸
路州縣管民官無領其事官吏隱匿及擅易馬匹私
配婦人者沒其家禁官吏軍民賣所娶江南良家子
女及爲娼者賣買者兩罪之官沒其直人復爲良賜
湖州長興縣金沙泉名爲瑞應泉金沙泉不常出唐
時用此水造紫筍茶進貢有司具牲幣祭之始得水
事訖輒涸宋末屢加浚治泉迄不出至是中書省遣
官致祭一夕水溢可溉田千畝安撫司以事聞故賜
今名封磁州神崔府君爲齊聖廣佑王壬寅弛女直

水達達酒禁丙午安西王相府言萬戶禿滿峇兒郝
札刺不花等攻克瀘州斬其主將王世昌李都統戊
申從阿合馬請自今御史臺非白于省毋擅召倉庫
吏亦毋究錢穀數及集議中書不至者罪之授宋福
王趙與芮金紫光祿大夫檢校大司農平原郡公庚
戌東川副都元帥張德閏大敗涪州兵斬州將王明
及其子忠訓總轄韓文廣張遇春詔軍官不能撫治
軍士及役擾致逃亡者沒其家貲之半以阿你哥爲
大司徒兼領將作院二月戊午祀先農蒙古胄子代
耕藉田癸亥咸淳府等郡及良平民戶饑以鈔千錠

元史本紀卷十
二
賑之命平章政事阿塔海阿里選擇江南廉能之官
去其冗員與不勝任者復立河中府萬泉縣辛未以
川蜀地多嵐瘴弛酒禁丁丑熒惑犯天街庚辰征別
十八里軍士免其徭役壬午叅知政事福建路宣慰
使唆都率師攻潮州破之置太史院命太子贊善王
恂掌院事工部郎中郭守敬副之集賢大學士兼國
子祭酒許衡領焉改革亭縣為松江府遣使代祀嶽
瀆以叅知政事夏貴范文肅陳巖並為中書左丞黃
州路宣慰使唐兀帶入弼並叅知政事三月乙酉詔
蒙古帶唆都蒲壽庚行中書省事于福州鎮撫瀕海

諸郡以沁海經畧副使合剌帶領舟師南征陞經畧
使兼左副都元帥佩虎符丁亥太陰犯太白戊子太陰
犯熒惑己丑行中書省請考覈行御史臺文卷不從甲
午西川行樞密院招降西蜀重慶等處得府三州六
軍一監一縣二十柵四十蠻夷一乙未宋廣王昺遣
倪堅以表來上令俟命大都命揚州行省選鐵木兒
不花所部兵助隆興進討丁酉命塔海毀夔府城壁
戊戌劉宗純據德慶府梧州萬戶朱國寶攻之焚其
寨柵遂拔德慶詔中書左丞呂文煥遣官招宋生熟
券軍堪為軍者月給錢糧不堪者給牛屯田庚子漢

元史本紀卷一
三
軍都元帥李庭自願將兵擊張世傑從之西川行樞
密院招宜勝土恢等城及石榴寨相繼來降壬寅以
諸路歲比不登免今年田租絲銀癸卯都元帥楊文
安遣兵攻克紹慶執其郡守鮮龍命斬之乙巳廣南
西道宣慰司遣管軍總管崔求千戶劉潭王德用招
降雷化高三州即以求等鎮守之宋張世傑蘇劉義
挾廣王昺奔碭洲叅知政事密立忽辛張守智並行
大司農司事夏四月乙卯命元帥劉國傑將萬人北
征賜將士鈔二萬六百七十一錠修會川縣盤古王祠
祀之丙辰詔以雲南境土曠遠未降者多簽軍萬人

進討戊午以江南土寇竊發人心未安命行中書省
左丞夏貴等分道撫治軍民檢覈錢穀察郡縣被旱災
甚者吏廉能者舉以聞其貪殘不勝任者劾罷之甲
子命不花留鎮西川汪惟正率獲功蒙古漢軍官及
降臣入覲大都巡軍之戍西川者遣還立雲南湖南
二轉運司以時雨露足稍弛酒禁民之衰疾飲藥者
官爲醞釀量給之辛未置光祿寺以同知宣徽院事
秃剌鐵木兒爲光祿卿廣州張鎮孫叛犯廣州守將
張雄飛棄城走出兵臨之鎮孫乞降命遣鎮孫及其
妻赴京師丁丑雲南行省招降臨安白衣和泥分地

城寨一百九所威楚金齒落落分地城寨軍民三萬二千二百禿老蠻高州筠連州等城寨十九所庚辰以許衡言遣使至杭州等處取在官書籍版刻至京師壬午立行中書省于建康府中書左丞崔斌言比以江南官冗委任非人命阿里等沙汰之而阿合馬溺於私愛一門子弟並爲要官詔並黜之又言阿老瓦丁臺臣劾其侵欺官錢事猶未竟今復授江淮叅政不可詔止其行敕自今罷免之官宰執爲宣慰宣慰爲路官路官爲州官淮淝鹽課直隸行省宣慰司官勿預改北京行省爲宣慰司追江南工匠官虎符

五月癸未朔詔諭翰林學士和禮霍孫今後進用宰執及主兵重臣其與儒臣老者同議乙酉行中書言近討邵武建昌吉撫等巖洞山寨獲聶大老戴巽子餘黨皆下獨張世傑據硯洲攻傍郡未易平擬遣宣慰使史格進討詔以也速海牙總制之敕主兵官若已擢授其舊職宜別授有功者勿復以子孫承襲申嚴無籍軍虜掠及傭奴代軍之禁甲午諸職官犯罪受宣者聞奏受敕者從行臺處之受省札者按察司治之其宣慰司官吏姦邪非違及文移案牘從本道提刑按察司磨刷應有死罪有司勘問明白提刑按

察司審覆無冤依例結案類奏待命自行中書以下
應行公務小事限七日中事十五日大事三十日選
江南銳軍爲侍衛親軍乙未以烏蒙路隸雲南行省
仍詔諭烏蒙路總管阿牟置立站驛修治道路其一
應事務並聽行省平章賽典赤節制立川蜀水驛自
叙州達荆南府己亥江東道按察使阿八赤求江東
宣慰使呂文煥金銀器皿及宅舍子女不獲誣其私匿
兵仗詔行臺大夫相威詰之事白免阿八赤官辛亥
制授張留孫江南諸路道教都提點賜拱衛司官及
其所部四百五十人鈔二千六十錠六月乙卯改西

番李唐城爲李唐州庚申敕博兒赤荅剌赤及司糧
司幣等官並勿授符已授者收之壬戌賜瀘州降臣
薛旺等鈔有差丙寅以江南防拓關隘一十三所設
官太冗選軍民官廉能者各一人分領陞濟南府爲
濟南路降西涼府爲西涼州丁卯置甘州和羅提舉
司以備給軍餉賑貧民甲戌詔汰江南冗官江南元
設淮東湖南隆興福建四省以隆興併入福建其宣
慰司十一道除額設員數外餘並罷去仍削去各官
舊帶相銜罷茶運司及營田司以其事隸本道宣慰
司罷漕運司以其事隸行中書省各路總管府依驗

戶數多寡以上中下三等設官宋故官應入仕者付吏部錄用以史塔刺渾唐兀帶驟陞執政忙古帶任無爲軍達魯花赤復遙領黃州宣慰使並罷之時准西宣慰使昂吉兒入覲言江南官吏太冗故有是命帝諭昂吉兒曰宰相明天道察地理盡人事能兼此三者乃爲稱職爾縱有功宰相非可覲者回回人中阿合馬才任宰相阿里年少亦精敏南人如呂文煥范文虎率衆來歸或可以相位處之又顧謂左右曰汝可諭姚樞等江南官吏太冗此卿輩所知而皆未嘗言昂吉兒乃爲朕言之近侍劉鐵木兒因言阿里

海牙屬吏張鼎今亦叅知政事詔即罷去遂命平章政事哈伯等諭中書省樞密院御史臺翰林院及諸南儒今爲宰相宣慰及各路達魯花赤佩虎符者俱多謬濫其議所以減汰之者凡小大政事順民之心所欲者行之所不欲者罷之乙亥敕省院臺諸司應聞奏事必由起居注丁丑太廟殿柱朽腐命太常少卿伯麻思告于太室乃易之戊寅全州西延溪洞徭蠻二十所內附己卯發蒙古軍千人從江東宣慰使張弘範由海道討宋餘衆叅知政事蒙古帶請頒詔招宋廣王昺及張世傑等不從庚辰處州張三八章

焱季文龍等爲亂行省遣宣慰使謁只里率兵討之
辛巳達實都收括中興等路闌遣安南國王陳光昞
遣使奉表來貢秋七月壬午朔湖南制置張烈良提
刑劉應龍與周隆賀十二起兵行省調兵往討獲周
隆賀十二斬之烈良等舉家及餘兵奔思州烏羅洞
爲官軍所襲二人皆戰死甲申賜親王愛牙赤所部
建都戍軍貧乏者鈔千二百七十七錠行御史臺增
設監察御史四員江南湖北道嶺南廣西道福建廣
東道並增設提刑按察司乙酉改江南諸路總管府
爲散府者七爲州者一散府爲州者二丙戌以江南

事繁行省官未有知書者恐於吏治非便分命崔斌
至揚州行省張守智至潭州行省丁亥詔虎符舊用
畏吾字今易以國字癸巳以塔海征夔軍旅之還戍
者及揚州江西舟師悉付水軍萬戶張榮實將之守
禦江口丙申以右丞塔出呂師夔叅知政事賈居貞
行中書省事于贛州福建江西廣東皆隸焉丁酉賜
江西軍與張世傑力戰者三十人各銀五十兩以江
西叅知政事李恒爲都元帥將蒙古漢軍征廣命揚
州行中書省分軍三千付李恒復上都守戍軍二千
人爲民壬寅改鑄高麗王王慎駙馬印丙午改開元

宣撫司為宣慰司太倉為御廩資成庫為尚用監皮
貨局入總管府定江南俸祿職田戊申濮州蝗己酉
禁使人經行納憐驛辛亥改京兆府為安西府詔江
南浙西等處毋非理征科擾民建漢祖天師正一祠
於京城以叅知政事李恒為蒙古漢軍都元帥忙古
帶為福建路宣慰使張榮實張鼎並為湖北道宣慰
使也的迷失為招討使八月壬子朔追毀宋故官所受
告身以嘉定重慶夔府既平還侍衛親軍歸本司遣
禮部尚書柴椿等使安南國詔切責之仍俾其來朝
丁己沁海經畧司行左副都元帥劉深言福州安撫
使王積翁既已降附復通謀於張世傑積翁上言兵
力單弱若不暫從恐為闔郡生靈之患詔原其罪壬
戌有首高興匿宋金者詔置勿問兩淮運糧五萬石
賑泉州軍民乙丑濟南總管張宏以代輸民賦嘗貸
阿里阿荅赤等銀五百五十錠不能償詔依例停徵
辛未復給漳州安撫使沈世隆家貲世隆前守建寧
府有郭贊者受張世傑檄誘世隆世隆執贊斬之蒙
古帶以世隆擅殺籍其家帝曰世隆何罪其還之仍
授本路管民總管中書省臣言近有旨追諸路管民
官所授金虎符其江南降臣宜仍所授從之制封泉

元史本紀卷十一
九
州神女號護國明著靈惠協正善慶顯濟天妃甲戌
安西王相府言川蜀悉平城邑山寨洞穴凡八十三
其渠州禮義城等處凡三十三所宜以兵鎮守餘悉
撤毀從之己卯初立提刑按察司于畏吾兒分地庚
辰以四川平勞賞軍士鈔二萬一千三百三十九錠
辛巳陞洛磁為廣平府路監察御史韓昺劾同知大
都路總管府事舍里甫丁毆部民至死詔杖之免其
官仍籍沒家貲十之二詔行中書省唆都蒲壽庚等
曰諸蕃國列居東南島嶼者皆有慕義之心可因蕃舶
諸人宣布朕意誠能來朝朕將寵禮之其往來互市

各從所欲詔諭軍前及行省以下官吏撫治百姓務
農樂業軍民官毋得占據民產抑良為奴以中書左
丞董文炳僉書樞密院事叅知政事唆都蒲壽庚並
為中書左丞九月壬午朔敕以總管張子良所簽軍
二千二百人為侍衛軍俾張亨陳瑾領之癸未省東西
川行樞密院其成都潼川重慶利州四處皆設宣慰司
詔分揀諸路所括軍驗事力乏絕者為民其恃權豪
避役者復為兵所遣分揀官及本府州縣官能核正
無枉者陞爵一級又減至元九年所括三萬軍半以
為民其商戶餘丁軍並除之戊子以征東元帥府治

東京庚寅昭信達魯花赤李海刺孫言願同張弘畧
取宋二王調漢軍水軍俾將之以中書左丞行江東
道宣慰呂文煥爲中書右丞冬十月己未享于太廟
常設牢醴外益以羊鹿豕蒲萄酒庚申車駕至自上
都辛酉賑別十八里日忽思等饑民鈔二千五百錠
分夔府漢軍二千新軍一千付塔海將之賜合答乞
帶軍士馬價幣帛二千匹其軍士力戰者賞賚有差
乙丑正一祠成詔張留孫居之丁卯弛山場樵採之
禁己巳趣行省造海船付烏馬兒張弘範增兵四千
俾將之庚午敕御史臺凡軍官私役軍士者視數多

寡定其罪詔河西西京南京西川北京等處宣慰司
案牘宜依江南近例令按察司磨照移河南河北道
提刑按察司治南京御史臺臣言失里伯之弟阿刺
與王權府等俘掠良民失里伯縱弗問及遣御史掾
詰問不伏詔執而鞠之十一月庚辰朔棗陽萬戶府
言李均收撫大洪山寨爲宋朱統制所害命賜銀千
兩贖其家丁亥以辰沅靖鎮遠等郡與蠻獠接壤民
不安業命塔海程鵬飛並爲荆湖北道宣慰使置司
常德路餘官屬留荆南府供給糧食軍需壬辰江東
道宣慰使囊加帶言江南旣平兵民宜各置官屬蒙

古軍宜分屯大河南北以餘丁編立部伍絕其虜掠之患分揀官僚本以革阿合馬濫設之弊其將校立功者例行沙汰何以勸後新附軍士宜令行省賜其衣糧無使闕乏帝嘉納之徵宋相馬廷鸞章鑑赴闕甲午開酒禁復阿合馬子忽辛阿散先等官始忽辛等以崔斌論列而免至是以張惠請故復之惠又請復其子麻速忽及其姪別都魯丁苦思丁前職帝疑惠不從敕已除官僚不之任者除名為農丁酉召陳巖入覲己亥貸侍衛軍屯田者鈔二千錠市牛具辛丑建寧政和縣人黃葉集鹽夫聯絡建寧括蒼及畬民婦自稱許夫人為亂詔調兵討之予未行中書省自揚州移治杭州立淮東宣慰司于揚州以阿剌罕為宣慰使詔諭公海官司通日本國人市舶以叅知政事程鵬飛行荆湖北道宣慰使閏月庚戌朔羅氏鬼國主阿榨西南蕃主帝昌盛並內附詔阿榨帝昌盛各為其地安撫使佩虎符辛亥太白熒惑填星聚于房甲寅幸光祿寺丙辰詔禿魯赤同潭州行省官一真察戍還病軍所過州縣不加顧恤者按之甲子發蒙古漢軍都元帥張弘範攻漳州得山寨百五十戶百萬一是日諜報文天祥見屯潮陽港亟遣先鋒

張弘正總管囊加帶率輕騎五百人追及于五坡嶺
麓中大敗之斬首七千餘執文天祥及其將校四人
赴都十二月己卯簽書西川行樞密院皆順招誘都
掌蠻夷及其屬百一十人內附以其長阿永為西南
番蠻安撫使得蘭紐為都掌蠻安撫使賜虎符餘授
宣勅金銀符有差庚辰思州安撫使田景賢播州安
撫使楊邦憲請歸宋舊借鎮遠黃平二城仍徹戍卒
不允景賢等請降詔禁戍卒毋擾思播之民從之鴨
池等處招討使欽察所領南征新軍不能自贍者千
人命屯田于京兆乙酉伯顏以渡江收撫沙陽新城

陽羅堡閩淞等郡獲功軍士及降臣姓名來上詔授
虎符者入覲千戶以下並從行省授官丙戌揚州行
省上將校軍功九百三十四人授官有差丙申從播
州安撫楊邦憲請以鼎山仍隸播州庚子敕長春宮
修金錄大醮七晝夜丙午禁玉泉山樵採漁弋戊申
以叙州等處禿老蠻殺使臣撒里蠻命發兵討之封
伯夷為昭義清惠公叔齊為崇讓仁惠公以十六年
曆日賜高麗海州贛榆縣電傷稼免今年田租南寧
吉瑞萬安三郡內附開城路置屯田總管府廣安縣
隸之臨淄臨朐清河復為縣導肥河入于鄆淤陂盡

爲良田會諸王于大都以平宋所俘寶玉器幣分賜之賜諸王等金銀幣帛如歲例是歲西京奉聖州及彰德等處水旱民饑賑米八萬八百九十石粟三萬六千四十石鈔二萬四千八百八十錠有奇斷死罪五十二人

十六年春正月己酉朔高麗國王王愷遣其簽議中贊金方慶來賀兼奉歲幣壬子罷五翼探馬赤重役軍癸丑汪良臣言西川軍官父死子繼勤勞四十年乞顯加爵秩詔從其請詔以海南瓊崖儋萬諸郡俱平令阿里海牙入覲瀘州降臣趙金吳大才袁禹繩

等從征重慶其家屬爲叛者所殺詔賜鈔有差仍以叛者妻孥付金等赦高麗國置大灰艾州東京柳石孛落四驛甲寅無籍軍侵掠平民而諸王只必帖木兒所部爲暴尤甚命捕爲首者寘之法敕移贛州行省還隆興高麗國來獻方物辛酉合州安撫使王立以城降先是立遣間使降安西王相李德輝東川行院與德輝爭功德輝單舸至城下呼立出降川蜀以平東川行院遂言立久抗王師嘗指斥憲宗宜殺之樞密院以其事聞而降臣李諒亦訟立前殺其妻子有其財物遂詔殺立籍其家貲償諒既而安西王其

立降附本末上且言東川院臣憤李德輝受降之
故誣奏誅立樞密院臣亦以前奏爲非帝怒曰卿視
人命若戲耶前遣使計殺立久矣今追悔何及卿等
妄殺人其歸待罪斥出之會安西王使再至言未殺
立即召立入覲命爲潼川路安撫使知合州事壬戌
分川蜀爲四道以成都等路爲四川西道廣元等路
爲四川北道重慶等路爲四川南道順慶等路爲四
川東道並立宣慰司賞重慶等處從征蒙古漢軍鈔
三萬九千九百五十一錠改播州鼎山縣爲播川縣
丁卯賜叅知政事魯順田民百八十戶於江津縣戊

辰立河西屯田給畊具遣官領之甲戌張弘範將兵
追宋二王至崖山寨張世傑來拒戰敗之世傑遁去
廣王昺偕其官屬俱赴海死獲其金寶以獻丙子詔
諭又巴散毛等四洞番蠻酋長使降以中書左丞別
乞里迷失同知樞密院事禁中書省文冊奏檢用畏
吾字書賜異樣等局官吏工匠銀二千兩賜皇子奧
魯赤及諸王拜荅罕下軍士與思州田師賢所部軍
衣服及鈔有差二月戊寅朔祭先農千籍田壬午陸
深州爲路遣使訪求通皇極數番陽祝泌子孫其甥
傅立持必書來上撥民萬戶隸明里淘金以江南漕

運舊米賑軍民之饑者癸未增置五衛指揮司詔遣塔黑麻合兒撒兒答帶括中興戶太史令王恂等言建司天臺于大都儀象圭表皆銅爲之宜增銅表高至四十尺則景長而真又請上都洛陽等五處分置儀表各選監候官從之甲申平章阿里伯乞行中書省檢覈行御史臺文案且請行臺呈行省比御史臺呈中書省例從之以征日本敕揚州湖南贛州泉州四省造戰船六百艘移紹興宣慰司于慶州己丑調潭州行省軍五千戍沿海州郡庚寅張弘範以降臣陳懿兄弟破賊有功且出戰船百艘從征宋二王請

授懿招討使兼潮州路軍民總管及其弟忠義勇三人爲管軍總管十夫長塔刺海獲文天祥有功請授管軍千戶佩金符並從之壬辰詔諭宗師張留孫悉主淮東淮西荆襄等處道教乙未王速帖木兒言行臺文卷令行省檢覈於事不便詔改之其運司文卷聽御史臺檢覈饒州路達魯花赤玉古倫擅用羨餘糧四千四百石杖之仍沒其家詔湖南行省於戍軍還塗每四五十里立安樂堂疾者醫之饑者廩之死者藁葬之官給其需遣官覈實益都淄萊濟南逃亡民地之爲行營牧地者禁諸奧魯及漢人持弓矢其

元史卷之八十一
出征所持兵仗還即輸之官庫壬寅賜太史院銀一
千七十八兩癸卯發嘉定新附軍千人屯田脫里北
之地甲辰陞大都兵馬都指揮使司秩四品詔大都
河間山東管鹽運司並無管酒醋商稅等課程中書
省臣請以真定路達魯花赤蒙古帶爲保定路達魯
花赤帝曰此正人也朕將別以大事付之賞汪良臣
所部蒙古漢軍收附四川功鈔五萬錠命嘉定以西
新附州郡及田楊二家諸貴官子俱充質子入侍車
駕幸上都乙巳命同知太史院事郭守敬訪求精天
文曆數者西蜀四川道立提刑案察司丙午遣使代

祀嶽瀆后土詔河南西京北京等路課程令各道宣
慰司領之賞西川新附軍鈔三千八百五十錠以幹
端境內蒙古軍耗乏并漢軍新附軍等賜馬牛羊及
馬驢價鈔衣服弓矢鞍勒各有差三月戊申朔詔禁
歸德亳壽臨淮等處畋獵庚戌敕郭守敬繇上都大
都歷河南府抵南海測驗畧景壬子囊加帶括兩淮
造田田礮新附軍匠六百及蒙古回回漢人新附人
能造礮者俱至京師庚申給千戶馬乃部下拔突軍
及土渾川軍屯田牛具丙寅敕中書省凡掾史文移
稽緩一日二日者杖三日者死甲戌潭州行省遣兩

元史卷之七十七
淮招討司經歷劉繼昌招下西南諸番以龍方零等
為小龍蕃等處安撫使仍以兵三千戍之中書省下
太常寺講究州郡社稷制度禮官折衷前代參酌儀
禮定擬祭祀儀式及壇壝祭器制度圖寫成書名曰
至元州縣社稷通禮上之以保定路旱減是歲租三
千一百二十石夏四月己卯立江西權茶運司及諸
路轉運鹽使司宣課提舉司癸巳以給事中兼起居
注掌隨朝諸司奏聞事戊戌以池州路達魯花赤阿
塔赤戰功陞招討使兼本軍萬戶癸卯填星犯鍵閉
乙巳汪良臣言昔魯順兵犯成都掠其民以歸今嘉

定既降宜還其民成都制曰可敕上都軍四千衛
都城凡他所來戍者皆遣歸從唆都請令泉州僧依
宋例輸稅以給軍餉詔諭揚州行中書省選南軍精
銳者二萬人充侍衛軍併發其家赴京師仍給行費
鈔萬六千錠大都等十六路蝗五月己酉中書省請
復授宣慰司官虎符不允又請各路設提舉同提舉
副提舉各一員專領課程從之辛亥蒲壽庚請下詔
招海外諸蕃不允詔諭漳泉汀邵武等處暨八十四
畝官吏軍民若能舉眾來降官吏例加遷賞軍民按
堵如故以泉州經張世傑兵減今年租賦之半丙辰

以五臺僧多匿逃奴及逋賦之民敕西京宣慰司案
察司搜索之命畏吾界內計畝輸稅以各道案察司
地廣事繁併勸農官入案察司增副使僉事各一員
兼職勸農水利事甲子御史臺臣言先是省臣阿里
伯言有罪者與臺臣相威同問有旨從之臣等謂行
省斷罪以意出入行臺何由舉正宜從行省問訖然
後體察爲宜制曰可高興侵用宋二王金三萬一千
一百兩有奇銀二十五萬六百兩詔遣使追理詔漣
海等州募民屯田置總管府及提舉司領之乙丑敕
江陵等路拔突戶一萬凡千戶置達魯花赤一員直

隸省部丙寅敕江南僧司文移毋輒入迤臨洮鞏昌
通安等十驛非有海青符不聽乘傳丁卯改雲南寶
山崑渠二縣爲州己巳詔沿路驛店民家凡往來使
臣不當乘傳者毋給人畜飲食芻料完都河南七驛
民貧乏給其馬牛羊價鈔千八百錠庚午賜乃蠻帶
戰功及攻圍重慶將士及宣慰使劉繼昌等鈔衣服
各有差壬申以呂虎來歸授順慶府總管佩虎符仍
賜鈔五十錠徙丁子峪所駐侍衛軍萬人屯田昌平
癸酉兀里養合帶言賦北京西京車牛俱至可運軍
糧帝曰民之艱苦汝等不問但知役民使今年盡取

之來歲禾稼何由得種其止之甲戌給要束合所領
工匠牛二千就令運米二千石供軍詔諭脫兒赤等
管甘州路宣課諸人毋或沮擾潭州行省上官瓊州
宣慰馬旺已招降海外四州尋有土寇黃威遠等四
人爲亂今已擒獲詔置之極刑丙子進封桑軋河洪
濟公爲顯應洪濟公命宗師張留孫即行宮作醮事
奏赤章于天凡五晝夜賜皇子奧魯赤撥里荅等及
千戶伯牙兀帶所部軍及和州站戶羊馬鈔各有差
六月丁丑朔阿合馬言常州路達魯花赤馬恕告發
浙西案察司事高源不法四事源亦劾恕事聞詔

令廷辯詔發新附軍五伯人蒙古軍百人漢軍四百
人戍礪門魚通黎雅詔諭王相府及四川行中書省
四道宣慰司撫治播川務川西南諸蠻夷官吏軍民
各從其俗無失常業壬午以浙東宣慰使陳祐沒王
事命其子夔爲管軍總管佩虎符甲申宋張世傑所
部將校百五十八人詣瓊雷等州來降敕造戰船征
日本以高麗材用所出即其地製之令高麗王議其
便以聞乙酉榆林洪贊刁窩每驛益馬百五十車二
百牛如車數給之丙戌左右衛屯田蝗蝻生庚寅陞
濟寧府爲路壬辰以叅知政事行河南等路宣慰使

忽辛爲中書左丞行中書省事癸巳以新附軍二萬分隸六衛屯田徹里帖木兒言其部軍多爲盜劫掠貲財有司不即理斷乞遣官詰治詔兀魯帶往治之以不花行西川樞密院事總兵入川平宋諸城之未下者仍令東川行樞密院調兵守釣魚山寨西川既平復立屯田其軍官第功陞擢凡授宣敕金銀符者百六十一人詔以高州筠連州騰川縣新附戶於瀘州等處治道立驛雲南都元帥愛魯納速刺丁招降西南諸國愛魯將兵分定亦乞不薛納速刺丁將大理軍抵金齒蒲驃曲蠟緬國界內招忙木巨木禿等寨三百籍戶十一萬二百詔定賦租立站迎設衛送軍軍還獻馴象十二戊戌改宣德府龍門鎮復爲縣庚子拘括河西西番闌遺戶辛丑以通州水路淺舟運甚艱命樞密院發軍五千仍令食祿諸官雇役千人開浚以五十日訖工癸卯以臨洮鞏昌通安等十驛歲饑供役繁重有質賣子女以供役者命選官撫治之甲辰以襄陽屯田戶四百代軍當驛役賜征北諸郡蒙古軍闕闕八都等力戰有功者銀五十兩戰歿者家給銀百兩從行伍者鈔一錠其餘衣物有差禁伯顏察兒諸峪寨捕獵詔免四川差稅以叅知政

事行中書省事別都魯丁爲河南等路宣慰使以阿合馬子忽辛爲潭州行省左丞忽失海牙等並復舊職占城馬八兒諸國遣使以珍物及象犀各一來獻賜諸王所部銀鈔衣服幣帛鞍勒弓矢及羊馬價鈔等各有差五臺山作佛事秋七月戊申寧國路新附軍百戶詹福謀叛福論死授告者何士青總把銀符仍賜鈔十錠罷西川行省庚戌禁脫脫和孫搜取乘傳者私物乙卯應昌府依例設官置東宮侍衛軍定江南上中路置達魯花赤二員下路一員敕發西川蒙古軍七千新附軍三千付皇子安西王丁巳交趾

國遣使來貢馴象己未以朶哥麻思地之筭木多城爲鎮西府敕以蒙古軍二千益都軍二千諸路軍一千新附軍五千合萬人令李庭將之壬戌賞瓮吉刺所部力戰軍人銀五十兩死事者人百兩給其家阿里海牙入覲獻金三千五百八十兩銀五萬三千一百兩罷潭州行省造征日本及交趾戰船丙寅填星犯鍵閉癸酉西南八番羅氏等國來附洞寨凡千六百二十有六戶凡十萬一千一百六十有八詔遣牙納朮崔或至江南訪求藝術之人以中書左丞行四川行中書省事汪良臣爲安西王相賜諸王納里忽

所部有功將校銀鈔衣裳幣帛羊馬有差以趙州等
處水旱減今年租三千一百八十一石命散都修佛
事十有五丁八月丁丑車駕至上都庚辰太陰犯
房距星戊子范文虎言臣奉詔征討日本比遣周福
藥忠與日本僧賈詔往諭其國期以來年四月還報
待其從否始宜進兵又請簡閱舊戰船以充用皆從
之海賊賀文達率衆來歸文虎文虎以所得銀三工
兩來獻有旨釋其前罪官其徒四十八人就以銀賜
文虎已丑宋降臣王虎臣陳便宜十七事令張易等
議可者行之庚寅敕沅州路蒙古軍總管乞荅合征

取桐木籠犵狁伯洞諸蠻未附者調江南新附軍五
千駐太原五千駐大名五千駐衛州以每歲聖誕節
及元辰日禮儀費用皆斂之民詔天下罷之丁酉以
江南所獲王爵及玷凡四十九事納于太廟己亥海
賊金通精死獲其從子温有司欲論如法帝曰通精
已死温何預焉特赦其罪庚子歲星犯軒轅大星甲
辰詔漢軍出征逃者罪死且沒其家置大護國仁王
寺總管府以散札兒爲達魯花赤李光祖爲總管賜
范文虎僚屬二十一人金紋綾及西錦衣賞征重慶
將校幣帛有差賜諸王阿只吉糧五千石馬六百疋

羊萬口九月乙巳朔范文虎薦可爲守令者三十人
詔今後所薦朕自擇之凡有官守不勤於職者勿問
漢人回回皆論誅之且沒其家女直水達達軍不出
征者令隸民籍輸賦已酉罷金州守船軍千人量留
監守餘皆遣還庚戌詔行中書省左丞忽辛兼領杭
州等路諸色人匠以杭州稅課所入歲造繒段十萬
以進杭蘇嘉興三路辦課官吏額外多取分例今後
月給食錢或數外多取者罪之阿合馬言王相府官
趙炳云陝西課程歲辦萬九千錠所司若果盡心措
辦可得四萬錠即命炳總之同知揚州總管府事董

仲威坐贓罪行臺方按其事仲威反誣行臺官以他
事詔免仲威官仍沒其產十之二戊午王相府言四
川宣慰司有籍無軍虛受賞者一萬七千三百八人
命詰治之議罷漢人之爲達魯花赤者御史臺臣言
江南三路管課官於分例外支用鈔一千九百錠命
盡徵之詔遣使招諭西南諸蠻部族酋長能率所部
歸附者官不失職民不失業乙丑以忽必來別速台
爲都元帥將蒙古軍二千人河西軍一千人戍幹端
城己巳樞密院臣言有唐兀帶者冒禁引軍千餘人
於辰溪沅州等處劫掠新附人千餘口及牛馬金銀

幣帛等而麻陽縣達魯花赤武伯不花為之鄉導敕
斬唐兀帶武伯不花餘減死論以所掠者還其民給
河西行省鈔萬錠以備支用冬十月己卯享于太廟
辛巳叙州夔府至江陵界立水驛乙酉帝御香閣命
大樂署令完顏椿等肄文武樂戊子張融訴西京軍
戶和買和崔有司匿所給價鈔計萬八千餘錠官吏
坐罪以融為侍衛軍總把千戶脫畧總把忽帶擅引
軍入婺州永康縣界殺掠吏民事覺自陳扈從先帝
出征有功乞貸死敕沒入其家貲之半杖遣之辛卯
賑和州貧民鈔乙未納碧玉爵于太廟丙申太陰犯

太微西垣上將辛丑以月直元辰命五祖真人李居
壽作醮事奏赤章凡五晝夜畢事居壽請問言皇太
子春秋鼎盛宜預國政帝喜曰尋將及之明日下詔
皇太子燕王參決朝政凡中書省樞密院御史臺及
百司之事皆先啓後聞甲辰賜高麗國王至元十七
年曆日十一月戊申敕諸路所捕盜初犯贓多者死
再犯贓少者從輕罪論阿合馬言有盜以舊鈔易官
庫新鈔百四十錠者議者謂罪不應死且盜者之父
執役臣家不論如法寧不自畏詔處死壬子遣禮部
尚書柴椿偕安南國使杜中贊賚詔往諭安南國世

子陳日烜責其來朝癸丑太陰犯熒惑乙卯罷太原
平陽西京延安路新簽軍還籍罷招討使劉萬奴所
管無籍軍願從大軍征討者趙炳言陝西運司郭同
知王相府郎中令郭叔雲盜用官錢敕尚書禿速忽
侍御史郭祐檢覈之戊辰命湖北道宣慰使劉深教
練鄂州漢陽新附水軍詔諭四川宣慰司括軍民戶
數己巳以梧州妖民吳法受扇惑藤州德慶府瀧水
徃蠻爲亂獲其父誅之併教坊司入拱衛司十二月
戊寅發粟鈔賑鹽司竈戶之貧者括甘州戶庚辰安
南國貢藥財甲申祀太陽丙申敕樞密翰林院官就

中書省與唆都議招收海外諸番事丁酉八里灰貢
海青回回等所過供食羊非自殺者不食百姓苦之
帝曰彼吾奴也飲食敢不隨我朝乎詔禁之詔諭海
內海外諸番國主賜右丞張惠銀五千四百兩敕自
明年正月朔日建醮于長春宮凡七日歲以爲例命
李居壽告祭新歲詔諭占城國主使親自來朝唆都
所遣闍婆國使臣治中趙玉還改單州兗州隸濟寧
路復置萬泉縣隸河中府改垣曲縣隸絳州降歸州
路爲州陞沔陽安陸各爲府改京兆爲安西路改惠
州建寧梧州柳州象州邕州慶遠賓州橫州容州潯

州並為路建聖壽萬安寺于京城帝師亦憐吉卒救
諸國教師禪師百有八人即大都萬安寺設齋圓戒
賜衣是歲斷死罪百三十二人保定等二十餘路水
旱風雹害稼

本紀卷第十

本紀卷第十一

元史十一

翰林學士大知制誥兼修國史吳濂 翰林待制直學士知制誥兼國史院編修官王禕等奉
勅

世祖八

十七年春正月癸卯朔高麗國王王暎遣其僉議中
贊金方慶來賀兼奉歲貢丙午命萬戶綦公直戍別
失八里賜鈔一萬二千五百錠辛亥磁州永平縣水
給鈔貸之丙辰立遷轉官員法凡無過者授見關物
故及過犯者選人補之滿代者令還家以俟又定諸
路差稅課程增益者即上報隱漏者罪之不須履畝

增稅以搖百姓詔括江淮銅及銅錢銅器辛酉以海賊賀文達所掠良婦百三十餘人還其家廣西廉州海賊霍公明鄭仲龍等伏誅甲子敕泉州行省所轄州郡山寨未即歸附者率兵拔之已拔復叛者屠之以總管張瑄千戶羅璧收宋二王有功陞瑄沿海招討使虎符壁管軍總管金符丁卯畋近郊詔毋以待衛軍供工匠役戊辰敕相威檢覈阿里海牙忽都帖木兒等所俘丁三萬二千餘人並放為民置行中書省于福州改德慶路為總管府賜開灤河五衛軍鈔二月乙亥張易言高和尚有秘術能役鬼為兵遙制敵

人命和禮霍孫將兵與高和尚同赴北邊丙子立北京道二驛丁丑荅里不罕以雲南行省軍攻定昌路擒總管谷納殺之詔令荅里不罕還以阿荅代之敕非遠方歸附人毋入會同館詔納速刺丁將精兵萬人征緬國乙酉賞納速刺丁所部征金齒功銀五千三百二十兩己丑命梅國賓襲其父應春瀘州安撫使職瀘州嘗叛應春為前重慶制置使張珏所殺國賓詣闕訴寃詔以珏界國賓使復其父讎珏時在京兆聞之自經死國賓請贖還瀘州軍民之為俘者從之日本國殺國使杜世忠等征東元帥忻都洪茶丘

請自率兵往討廷議姑少緩之丙申詔諭真人析
志誠等焚毀道箴偽妄經文及板庚子阿里海牙及
納速刺丁招緬國及洞蠻降臣詔就軍前定錄其功
以聞江淮行省左丞夏貴請老從之仍官其子孫合
刺所部和州等城爲叛兵所掠者賜鈔給之仍免其
民差役三年發侍衛軍三千浚通州運糧河畏吾戶
居河西界者令其屯田辛丑以廣中民不聊生召右
丞塔出左丞呂師夔廷詰壞民之由命也的迷失賈
居貞行宣慰司往撫之師夔至廷辯無驗復令還省
治事詔王相府於諸奧魯市馬二萬六千三百匹遣

使代祀岳瀆賜諸王阿八合那木干所部及征日本
行省阿刺罕范文虎等西錦衣銀鈔幣帛各有差又
賜四川貧民及兀刺帶等馬牛羊價鈔三月癸卯命
福建王積翁入領省事中書省臣以爲不可改戶部
尚書甲辰車駕幸上都思播州軍侵鎮遠黃平界命
李德輝等往視之罷通政院官不勝任者丙午敕東
西兩川發蒙古漢軍戍魚通黎雅乙卯立都功德使
司從二品掌奏帝師所統僧人并吐蕃軍民等事已
未詔討羅氏鬼國命以蒙古軍六千哈刺章軍一萬
西川藥刺海萬家奴軍萬人阿里海牙軍萬人三道

並進癸亥高郵等處饑賑粟九千四百石辛未立長
吾境內交鈔提舉司給月脫古思八部屯田牛具賜
忙古帶等羊馬及皇子南木合下羊馬價夏四月壬
申朔中書省臣言唆都軍士擾民故南劔等路民復
叛及忙古帶往招徠之民始獲安詔以忙古帶仍行
省福州癸酉南康杜可用叛命史弼討擒之定抗州
宣慰司官四員以游顯管如德忽都虎劉宣充之丙
子隆興路楊門站復為懷安縣庚辰四川宣慰使也
罕的斤請賜海青符命以二符給之壬午史弼入朝
乙酉以宋太常樂付太常寺改泗州靈璧縣仍隸宿
州丁亥立抗州路金玉總管府甲午敕軍戶貧乏者
還民籍丙申以羅佐山道梗敕阿里海牙發軍千人
戍守以隆興泉州福建置三省不便命廷臣集議以
聞己亥諸王只必帖木兒請各投下設官不從庚子
歲星犯軒轅大星敕權停百官俸寧海益都等四郡
霜真定七郡蟲皆損桑五月辛丑朔樞密院調兵六
百守居庸南北口甲辰作行宮于察罕腦兒丙午陞
沙州為路癸丑括沙州戶丁定常賦其富戶餘田令
所戍漢軍耕種詔雲南行省發四川軍萬人命藥刺
海領之與前所遣將同征緬國高麗國王王晷以民

元史卷之九十一 四
饑乞貸糧萬石從之福建行省移泉州甲寅汀漳叛
賊廖得勝等伏誅造船三千艘敕耽羅發材木給之
庚申賜諸王別乞帖木兒銀印辛酉賜國師掌教所
印賞伯顏將士戰功銀二萬八千七百五十兩真定
咸平忻州漣海邳宿諸州郡蝗六月辛未朔以忽都
帶兒奴籍闡遺人民牛畜撥荒地令屯田壬申復招
諭占城國丁丑唆都部下顧摠管聚黨於海道劫奪
商貨范文虎招降之復議寘于法命文虎等集議處
之阿荅海等請罷江南所立稅課提舉司阿合馬力
爭詔御史臺選官檢覈其實以聞阿合馬請立太宗

正府罷上都與魯官以留守司兼管與魯事西安王
薨罷其王相府遣呂告蠻部安撫使王阿濟同萬戶
督坤招諭羅氏鬼國壬辰召范文虎議征日本戊戌
高麗王王曙遣其將軍朴義來貢方物江淮等處頒
行鈔法廢宋銅錢遣不魯合荅等檢覈江淮行省阿
里伯燕帖木兒錢穀改泗州隸淮安路賜忽烈禿忽
不刺等將士力戰者銀鈔及給折可察兒等軍士羊
馬價鈔各有差秋七月辛丑廣東宣慰使帖木兒不
花言諸軍官宜一例遷轉江淮郡縣首亂者誅沒其
家官豪隱庇佃民不供徭役宜別立籍各萬戶軍交

參重役宜發還元翼詔中書省樞密院翰林院集議以聞敕思州安撫司還舊治戊申大陰掩房距星以高麗國初置驛站民乏食命給糧一歲仍禁使臣往來勿求索飲食己酉立行省于京兆以前安西相李德輝為參知政事兼領錢穀事徙泉州行省于隆興以秃古減軍劫食火拙畏吾城木民饑命官給驛馬之費仍免其賦稅三年大陰犯南斗甲寅發衛兵八百治沙嶺橋敕毋踐民田戊午從阿合馬言以參知政事郝禎耿仁並為中書左丞用姚演言開膠東河及收集逃民屯田漣海甲子遣安南國王子倪還括蒙古軍成丁者敕亦來等率萬人入羅氏鬼國如其不附則入討之乙丑罷江南財賦總管府丁卯併大都鹽運司入河間為一仍減汰冗員割建康民二萬戶種稻歲輸釀米三萬石官為運至京師戊辰詔括前願從軍者及張世傑潰軍使征日本命范文虎等招集避罪附宋蒙古回回等軍己巳遣中使咬難歷江南名山訪求高士且命持香幣詣信州龍虎山臨江閣皂山建康三茅山皆設醮賜阿赤黑等及怯薛都等戰功銀鈔賜招收散毛等洞官吏衣段八月庚午朔蕭簡等十人歷河南五路擅招闡遺戶事覺謫其

為首者從軍自効餘皆杖之乙亥改蒙古侍衛總管
為蒙古侍衛親軍都指揮使司丙子太陰犯心東星
丁丑竣都請招三佛齊等八國不從鎮守南劍路萬戶呂宗海
竊兵亡去詔追捕之戊寅占城馬八兒國皆遣使奉
表稱臣貢寶物犀象以前所括願從軍者為軍付茶
忽領之征日本丁亥許衡致仕官其子師可為懷孟
路總管以便侍養納碧玉盞六白玉盞十五于太廟
癸巳賜西平王所部糧戊戌高麗王王晡來朝且言
將益兵三萬征日本以范文虎忻都洪茶丘為中書
右丞李庭張瑄為參知政事並行中書省事賜闊里吉思等鈔迷

里兀合等羊馬怯魯憐等牛羊馬價及東宮位下怯
怜口等粟帛大都北京懷孟保定南京許州平陽旱
濮州東平濟寧磁州水九月壬子車駕至自上都壬
戌也罕的斤進征斡端癸亥命沿途廩食和林回軍
甲子太陰掩右執法并犯歲星乙丑守庫軍盜庫鈔
八刺合赤分其贓縱盜遁去詔誅之丁卯羅氏鬼國
主阿察及阿里降安西王相李德輝遣人偕入覲賜
八刺合赤等羊馬價二萬八千三錠及充渾下貧民
糧三月冬十月庚午塔刺不罕軍與賊力戰者命給
田賞之癸酉加高麗國王王晡開府儀同三司中書

元史本紀卷第十一
左丞相行中書省事甲戌遣使括開元等路軍三千
征日本丙子賜雲南王忽哥赤印丁丑以湖南兵萬
人伐亦奚不薛亦奚不薛降戊寅發兵十萬命范文
虎將之賜右丞洪茶丘所將征日本新附軍鈔及甲
辛巳立營田提舉司從五品俾置司柳林割諸色戶
千三百五十五隸之官給牛種農具壬午詔立陝西
四川等處行中書省以不花為右丞李德輝汪惟正
並左丞時德輝已卒甲申詔龍虎山天師張宗演赴
關已丑命都實窮黃河源辛卯以漢軍屯田沙甘壬
辰亦奚不薛病遣其從子入覲帝曰亦奚不薛不稟

命輒以職授其從子無人臣禮宜令亦奚不薛出乃
還軍癸巳詔諭和州諸城招集流移之民丙申命在
官者任事一月後月乃給俸或發事者斥之遣使諭
爪哇國及交趾國始製象轎給怯烈等糧賜火察家
貧乏者十一月己亥朔翰林學士承旨和禮霍孫等
言俱藍馬八闍婆交趾等國俱遣使進表乞荅詔從
之仍賜交趾使人職名及弓矢鞍勒降詔招諭爪哇
國乙巳置泉府司掌領御位下及皇太子皇太后諸
王出納金銀事敕別置局院以處童匠有貧乏者給
以鈔幣詔有罪配役者量其程遠近犯罪當死者詳

元史本紀卷第十一
八
加審讞戊申中書省臣議流通鈔法凡賞賜宜多給幣帛課
程宜多收鈔制曰可庚戌命和禮霍孫東汰交趾國
使除可留者餘皆放還辛亥敕緩營建工役壬子詔
諭俱藍國使來歸附甲寅太原路堅州進嘉禾六莖
壬戌詔江淮行中書省括巧匠甲子詔頒授時曆丁
卯詔以末甘孫民貧除倉站稅課外免其役三年復
遣宣慰使教化孟慶元等持詔諭占城國主令其子
弟或大臣入朝詔江南江北陝西河間山東諸鹽場
增撥竈戶賜將作院呂合刺工匠銀鈔幣帛十二月
庚午以江淮行省平章政事阿里伯左丞燕鐵木兒

檀易命官八百員自分左右司官鑄銀銅印復違命
不散防守軍敕誅之辛未以熟券軍還襄陽屯田高
麗國王王瞻領兵萬人水手萬五千人戰船九百艘
糧一十萬石出征日本給右丞洪茶丘等戰具高麗
國鎧甲戰襖諭諸道征日本兵取道高麗毋擾其民
以高麗中贊金方慶為征日本都元帥密直司副使
朴球金周鼎為管高麗國征日本軍萬戶並賜虎符
癸酉以高麗國王王瞻為中書右丞相甲戌復授征
日本軍官元佩虎符丁丑用忽辛言以民當站役十
戶為率官給一馬死則買馬補之戊寅以奉使木剌

由國速刺蠻等爲招討使佩金符已卯羅氏鬼國土
寇爲患思播道路不通發兵千人與洞蠻開道甲申
甘州增置站戶詔於諸王戶藉內簽之乙酉救民避
役竄名匠戶者復爲民淮西宣慰使昂吉兒請以軍
士屯田阿塔海等以發民兵非便宜募民願耕者耕
之且免其租三年從之丁亥復詔管民官兼管諸軍
與魯戍子以征也可不薛軍千五百復還塔海戍八
番羅甸壬辰陳桂龍據漳州反唆都率兵討之桂龍
亡入畬洞甲午大都重建太廟成自舊廟奉遷神主
于祔室遂行大享之禮置鎮比庭都護府于畏吾境

以脫脫木兒等領其事丙申遼東路所益兵以妻子
易馬敕以合輸賦稅贖還之敕鑲板印造帝師八合
思八新譯戒本五百部頒降諸路僧人左丞相阿木
巡歷西邊至別十八里以疾卒敕擅據江南逃亡民
田者有罪修桐栢山淮瀆祠以三茅山上清四十三
代宗師許道杞祈禱有驗命別主道教安南國來貢
馴象賜蠻洞主銀鈔衣物有差賑鞏昌常德等路饑
民仍免其徭役改拱衛司爲都指揮司陞尚舍監秩
三品立太倉提舉司秩五品改建寧雷州封州廉州
化州高州爲路以肇慶路隸廣南西道遷峽州路于

元史本紀卷第二十一
江北舊治復置鄆縣隸鞏昌路宿州靈璧縣復隸歸德是歲斷死罪一百二人

十八年春正月戊戌朔高麗國王王晳遣其簽議中贊金方慶來賀兼奉歲幣辛丑召阿刺罕范文肅囊加帶同赴闕受訓諭以拔都張珪李庭留後命忻都洪茶丘軍陸行抵日本兵甲則舟運之所過州縣給其糧食用范文肅言益以漢軍萬人文肅又請馬二千給禿失忽思軍及回回砲匠帝曰戰船安用此皆不從癸卯發鈔及金銀付孛羅以給貧民丁未畋于近郊敕江南州郡兼用蒙古回回人凡諸王位下合

設達魯花赤並令赴闕仍詔諭諸王阿只吉等知之已酉改黃州陽羅堡復隸鄂州辛亥遣使代祀嶽瀆后土壬子高麗王王晳遣使言日本犯其邊境乞兵追之詔以戊金州隘口軍五百付之丙辰車駕幸灤州改符寶局爲典瑞監收天下諸司職印丁巳制以六祖李全祐嗣五祖李居壽祭斗癸亥邵武民高日新據龍棲寨爲亂擒之賞忻都等戰功賜征日本諸軍鈔二月戊辰發侍衛軍四千完正殿賜征日本善射軍及高麗火長水軍鈔四千錠辛未車駕幸柳林高麗王王晳以尚主乞改宣命益駙馬二字制曰可

乙亥敕以耽羅新造船付洪茶丘出征詔以刑徒減死者付忻都爲軍揚州火發米七百八十三石賑被災之家詔諭范文虎等以征日本之意仍申嚴軍律立上都留守司陞叙州爲路隸安西省移潭州省治鄂州徙湖南宣慰司于潭州乙酉改畏吾斷事官爲北庭都護府陞從二品丙戌征日本國軍啓行瀨東饑發粟千二百七十餘石賑之己丑發肅州等處軍民鑿渠溉田給征日本軍衣甲弓矢海青符勅通政院官渾都與郭漢傑整治水驛自叙州至荆南凡十九站增戶二千一百船二百十二艘詔諭烏瑣納空

等母擾羅氏鬼國違者令國主阿利具以名聞福建省左丞蒲壽庚言詔造海船二百艘今成者五十民實艱苦詔止之乙未貞懿順聖昭天睿文光應皇后弘吉刺氏崩丙申車駕還宮詔三茅山三十八代宗師蔣宗瑛赴闕遣舟八八合赤等詣東海及濟源廟修佛事以中書右丞行江東道宣慰使阿刺罕爲中書左丞相行中書省事江西道宣慰使無招討使也的迷失叅知政事行中書省事以遼陽懿蓋北京大定諸州早免今年租稅之半三月戊戌許衡卒己亥敕黃平隸安西行省鎮遠隸潭州行省各遣兵戍守

甲辰命天師張宗演即宮中奏赤章于天七晝夜丙
午車駕幸上都丙辰陞軍器監爲三品辛酉立登聞
鼓院許有寃者撾鼓以聞夏四月辛未益雲南軍征
合刺章癸酉復頒中外官吏俸辛巳通泰二州饑發
粟二萬一千六百石賑之戊子置蒙古漢人新附軍
總管甲午命太原五戶絲就輸太原自太和嶺至別
十八里置新驛三十賜征日本河西軍等鈔五月癸
卯禁西北邊回回諸人越境爲商甲辰遣使賑瓜沙
州饑戊申罷霍州畏兀按察司己酉禁甘肅瓜沙等
州爲酒壬子免耽羅國今歲入貢白紵丙辰以烏蒙

阿謀宣撫司隸雲南行省歲星犯右執法庚申嚴鬻
人之禁乏食者量加賑貸壬戌詔括契丹戶勅耽羅
國達魯花赤塔兒赤禁高麗全羅等處田獵擾民者
六月丙寅敕賽典赤火尼赤分管烏木拔都怯兒等
八處民戶謙州織工百四十二戶貧甚以粟給之其
所鬻妻子官與贖還以太原新附軍五千屯田甘州
丁丑以按察司所劾羨餘糧四萬八千石餉軍己卯
以順慶路隸四川東道宣慰司安西等處軍站凡和顧
和買與民均役增陝西營田糧十萬石以克常費壬午
命耽羅戍力田以自給日本行省臣遣使來言大軍

駐巨濟島至對馬島獲島人言太宰府西六十里舊有戍軍已調出戰宜乘虛擣之詔曰軍事卿等當自權衡之癸未命中書省會計姚演所領漣海屯田官給之資與歲入之數便則行之否則罷去丁亥放乞赤所招獵戶七千爲民庚寅以阿剌罕有疾詔阿塔海統率軍馬征日本壬辰高麗國王王曙言本國置驛四十民畜凋弊救併爲二十站仍給馬價八百錠奉使木剌由國苦思丁至占城舡壞使人來言乞給舟糧及益兵詔給米一千四百餘石以中書左丞忽都帖木兒爲中書右丞行中書省事御史中丞行御史臺事忽剌出爲中書左丞行尚書省事賜皇子南木合所部工匠羊馬價鈔秋七月甲午朔命萬戶綦公直分宣慰使劉恩所將屯肅州漢兵千人入別十八里以嘗過西川兵百人爲嚮導丁酉敕甘州置和中所以給兵糧京兆四川分置行省於河西己亥阿剌罕卒庚子括回回砲手散居他郡者悉令赴南京屯田癸卯太陰犯房距星庚戌以忻都戌大和嶺所將蒙古軍還復令漢軍戍守以松州知州傑散禿哥前後射虎萬計賜號萬虎將軍賜貴赤合八兒禿所招和真淦等戶二千八百二十俾自領之辛酉唆都

征占城賜馳蓬以辟瘴毒占城國來貢象犀命天師
張宗演等即壽寧宮奏赤章于天凡五晝夜八月甲
子朔招討使方文言擇守令崇祀典戢姦吏禁盜賊
治軍旅獎忠義六事詔廷臣及諸老議舉行之丙寅
熒惑犯諸侯西第三星庚午忙古帶為中書右丞行
中書省事辛未敕隆興行省叅政劉合拔兕秃凡金
穀造作專領之乙亥甘州凡諸投下戶依民例應站
役申嚴大都總管府兵馬司左右巡院斂民之禁庚
寅以阿剌罕既卒命阿塔海等分戍三海口令阿塔
海就招海中餘寇高麗國王王晷遣其密直司使韓

康來賀聖誕節壬辰以開元等路六驛饑命給幣帛
萬二千匹其鬻妻子者官為贖之詔征日本軍回所
在官為給糧忻都洪茶丘范文庸李庭金方慶諸軍
船為風濤所激大失利餘軍回至高麗境十存一二
設醮于上都壽寧宮賜歡只兀部及滅乞里等羊馬
價及衆家奴等助軍羊馬鈔賜常河部軍貧乏者給
過西川軍糧海南諸國來貢象犀方物給怯薛丹糧
拘其所占田為屯田閏月癸巳朔熒惑犯司怪南第
二星阿塔海乞以戍三海口軍擊福建賊陳吊眼詔
以重勞不從敕守縉山道侍衛軍還京師壬辰瓜州

屯田進瑞麥一莖五穗丙午車駕至自上都庚戌太陰犯昴丁巳命播州每歲親貢方物改思州宣撫司爲宣慰司兼管內安撫使陞高麗簽議府爲從三品敕中書省減執政及諸司冗員遣兀良合帶運沙城等糧六千石入和林括江南戶口稅課庚申安南國貢方物江西行省薦舉兵官命罷之壬戌詔諭幹端等三城官民及忽都帶兒括不闌奚人口兩淮轉運使阿剌瓦丁坐盜官鈔二萬一千五百錠盜取和買馬三百四十四疋朝廷宣命格而弗頒又以官負所佩符擅與家奴往來貿易等事伏誅賜謙州屯田軍人鈔幣衣裘等物及給農具漁具償站匠等助軍羊馬價九月癸亥朔敕于近郊甲子增大都巡兵千人給鈔賑上都饑民癸酉商賈市舶物貨已經泉州抽分者諸處貿易止令輸稅益耽羅戍兵仍命高麗國給戰具庚辰還宮辛巳大都立蒙古站屯田編戶歲輸包銀者及真定等路闡遺戶並令屯田其在真定者與兔皮貨癸未京北等路歲辦課額自一萬九千錠增至五萬四千錠阿合馬尚以爲未實欲覈之帝曰阿合馬何知事遂止大都新安縣民復和顧和買甲申太陰犯軒轅大星壬辰占城國來貢方物賜修

大都城侍衛軍鈔幣帛有差賞北征軍銀鈔賜怯憐口及四斡耳朶下與范文肅所部將士羊馬衣服幣帛有差冬十月乙未享于太廟貞懿順聖昭天睿文光應皇后祔丙申募民淮西屯田己亥議封安南王號易所賜安南國畏吾字肅符以國字書之仍降詔諭安南國立日烜之叔遺愛爲安南國王庚子溪洞新附官鎮安州岑從毅縱兵殺掠迫死知州李顯祖召從毅入覲壬寅賜征日本將校衣裝幣帛靴帽等物有差乙巳命安西王府協濟戶及南山隘口軍於安西延安鳳翔六盤等處屯田河西置織毛段匠提

舉司丁未安南國置宣慰司以北京路達魯花赤孛顏帖木兒叅知政事行安南國宣慰使都元帥佩虎符柴椿忽哥兒副之給鈔萬錠付河西行省以備經費己酉張易等言叅校道書惟道德經係老子親著餘皆後人僞撰宜悉焚毀從之仍詔諭天下給隆興行省海青符命失里咱牙信合八刺麻合迭瓦爲占城郡王加榮祿大夫賜肅符立行中書省占城以唆都爲右丞劉深爲左丞兵部侍郎也里迷失叅知政事庚戌敕以海船百艘新舊軍及水手合萬人期以明年正月征海外諸番仍諭占城郡王給軍食以安

南國王陳遺愛入安南發新附軍千人衛送詔諭于
不昔國來歸附壬子用和禮霍孫言於揚州隆興鄂
州泉州四省置蒙古提舉學校官各二員以翰林學
士承旨撒里蠻兼領會同館集賢院事以平章政事
樞密副使張易兼領祕書監太史院司天臺事以翰
林學士承旨和禮霍孫守司徒改大都南陽真定等
處屯田孛蘭奚總管府爲農政院癸丑皇太子至自
北邊丙辰以兀良合帶言上都南四站人畜困乏賜
鈔給之庚申籍西川戶辛酉邵武叛人高日新降給
征日本回侍衛新附軍冬衣賜劉天錫等銀幣勝兀

刺等羊馬鈔諸王阿只吉等馬牛羊各有差十一月
癸亥朔詔諭探馬禮令歸附甲子敕誅陳吊服首惡
者餘並收其兵仗繫送京師己巳敕軍器監給兵仗
付高麗沿海等郡奉使占城孟慶元孫勝夫並爲廣
州宣慰使兼領出征調度高麗國金州等處置鎮邊
萬戶府以控制日本高日新及其弟鼎新等至闕以
日新兩爲叛首授山北路民職文慶之屬遣還泉州
賜有功將校二百二十三員銀十萬兩及幣帛弓矢
鞍勒有差詔安南國王給占城行省軍食高麗國王
請完濱海城防日本不允辛未給諸王阿只吉糧六

千石甲戌大陰犯五車次南星乙亥召法師劉道真
問祠太乙法丁丑太陰犯鬼壬午詔諭瓜哇國主使
親來覲昌州及蓋里泊民饑給鈔賑之丙戌給鈔二
萬錠付和林貿易敕征日本回軍後至者分戌泐海
丁亥太陰掩心東星給揚州行省新附軍將校鈔人
二錠已酉賜安南國出征新附軍鈔賜禮部尚書留
夢炎及出使馬八國俺都刺等鈔各有差十二月甲
午以龔吉刺帶為中書右丞相己亥罷日本行中書
省丙午太陰犯軒轅大星丁未議選侍衛軍萬人練
習以備扈從陞太常寺為正三品辛亥命西川行省

給萬家奴所部兵仗癸丑敕免益都淄萊寧海開河
夫今年租賦仍給其傭直乙卯以諸王札忽兒所占
文安縣地給付屯田丙辰調新附軍屯田獲福州叛
賊林天成戮于市免福州路今年稅二分十八年以
前租稅並免徵以漢州德陽縣隸成都府改漳州為
路賜禮部尚書謝昌元鈔賞捏古伯戰功銀有差償
阿只吉等助軍馬價賜塔刺海籍沒戶五十是歲保
定路清苑縣水平陽路松山縣旱高唐夏津武城等
縣蟲害稼並免今年租計三萬六千八百四十石斷
死罪二十二人

本紀卷第十一

本紀卷第十二

元史十二

翰林學士帶突知制誥兼修國史臣宋濂翰林待制承直郎兼國史院編修官臣王禕等奉
敕修

世祖九

十九年春正月壬戌朔高麗國王王暎遣其大將軍
金子廷來賀丙寅罷征東行中書省丁卯諸王札剌
忽至自軍中時皇子北平王以軍鎮阿里麻里之地
以禦海都諸王昔里吉與脫脫木兒夔木忽兒撒里
蠻等謀劫皇子北平王以叛欲與札剌忽結援於海
都海都不從撒里蠻悔過執昔里吉等北平王遣札

刺忽以聞妖民張圓光伏誅立太僕院撥信州民四百八戶隸諸王栢木兒丙子車駕畋于近郊丁丑高麗國王貢紬布四百匹丙戌賜西平王怯薛那懷等鈔一萬一千五百二十一錠二月辛卯朔車駕幸柳林饒州總管姚文龍言江南財賦歲可辦鈔五十萬錠詔以文龍爲江西道宣慰使兼措置茶法命司徒阿你哥行工部尚書納懷製飾銅輪儀表刻漏敕改給駙馬昌吉印修宮城太廟司天臺癸巳調軍一萬五千馬五千匹征也可不薛遣使代祀嶽瀆后土甲午甘州逃軍二千二百人自陳願挈家四千九百四

十口還戍敕以鈔一萬六百二十錠布四千九百四十匹驢四千九百四十頭給之議征緬國以太卜爲右丞也罕的斤爲叅政領兵以行戌戌給別十八里元帥綦公直軍需遣使往乾山造江南戰船千艘庚子賜諸王塔刺海籍沒五十戶願受十二戶孛羅歡理筭未徵糧二十七萬石詔徵之壬寅陸軍器監秩三品命軍官陣亡者其子襲職以疾卒者授官降一等具爲令授溪洞招討使郭昂等九人虎符仍賞張溫顏義顯銀各千兩收晃兀兒塔海民匠九百五十三戶入官乙巳立廣東按察司戊申車駕還宮己酉

元史本紀卷第三
二
減省部官冗員改上都宣課提領為宣課提舉司立
鐵冶總管府罷提舉司減大都稅課官十四員為十
員改羅羅斯宣慰司隸雲南省徙浙東宣慰司於溫
州分軍戍守江南自歸州以及江陰至三海口凡二
十八所庚戌以叅知政事唐兀帶等六人鎮守黃州
建康江陵池州興國壬子詔僉亦奚不薛及播思叙
三州軍征緬國癸丑大良平元帥蒲元圭遣其男世
能入覲甲寅車駕幸上都申嚴漢人軍器之禁丁巳
安州張撻驢以詐敕及偽為丞相孛羅署印伏誅戊
午賜雲南使臣及陝西簽省八八以下銀鈔衣服有

差籍福建戶數三月辛酉朔烏蒙民叛敕那懷火魯
思迷率蒙古漢人新附軍討之賞忽都答兒等戰功
牛羊馬益都千戶王著以阿合馬蠱國害民與高和
尚合謀殺之壬午誅王著張易高和尚于市皆醢之
餘黨悉伏誅甲申的斤帖林以已貲充屯田之費諸
王阿只吉以聞敕酬其直丙戌禁益都東平沁淮諸
郡軍民官捕獵戊子立塔兒八合你驛以烏蒙阿謀
歲輸驟馬給之以領北庭都護阿必失哈為御史大
夫行御史臺事夏四月辛卯敕和禮霍孫集中書省
部御史臺樞密院翰林院等官議阿合馬所管財賦

元史本紀卷第三
三
先行封籍府庫丁酉以和禮霍孫爲中書右丞相降
右丞相瓮吉剌帶爲留守仍同僉樞密院事戊戌征
蠻元帥完者都等平陳弔眼巢穴班師賞其軍鈔仍
令還家休息遣揚州射士戍泉州陳弔眼父文桂及
兄弟桂龍滿安納款命護送赴京師其黨吳滿張飛
迎敵就誅之敕以大都巡軍隸留守司壬寅立回易
庫中書左丞耿仁等言諸王公主分地所設達魯花
赤例不遷調百姓苦之依常調任蒲從本位下選代
爲宜從之以留守司兼行工部敕自今歲用官車勿
賦於民可即灤河造之給其糧費甲辰以甘州中興

屯田兵逃還太原誅其拒命者四人而賞不逃者乙
巳以阿合馬家奴忽都荅兒等久總兵權令博敷等
代之仍隸大都留守司弛西山薪炭禁以阿合馬之
子江淮行中書省平章政事忽辛罪重於父議究勘
之考覈諸處平準庫汰倉庫官御史臺臣言見在贓
罰鈔三萬錠金銀珠玉幣帛稱是詔留以給貧乏者
丙午收諸王別帖木兒總軍銀印敕也里可溫依僧
例給糧戊申寧國路太平縣饑民採竹實爲糧活者
三百餘戶敕出使人還不即以所給符上與上而有
司不即收者皆罪之凡文書並奏可始用御寶己酉

刊行蒙古畏吾兒字所書通鑑以和禮霍孫爲右丞
相詔天下庚戌行御史臺言阿里海牙占降民爲奴
而以爲征討所得有旨降民還之有司征討所得籍
其數量賜臣下有功者以興兵問罪海外天下供給
繁重詔慰諭軍民應有逋欠錢糧及官吏侵盜並權
停罷設懷孟路管河渠使副各一員拘括江南官豪
隱匿逃軍壬子罷江南諸司自給驛券丙辰敕以妻
女姊妹獻阿合馬得仕者黜之覈阿合馬占據民田
給還其主庇富強戶輸賦其家者仍輸之官北京宣
慰使阿老瓦丁濫舉非才爲管民官命選官代之議

設鹽使司賣鹽引法擇利民者行之仍令按察司磨
刷運司文卷定民間貸錢取息之法以三分爲率定
內外官以三年爲考滿任者遷叙未滿者不許超遷
禁吐蕃僧給驛太繁擾害於民自今非奉旨勿給給
控鶴人鈔一萬五錠及其官吏有差五月己未朔鈎
考萬億庫及南京宣慰司沙汰省部官阿合馬黨人
七百十四人已革者百三十三人餘五百八十一人
並黜之瀘州管軍總管李從坐受軍士賄縱其私還
致萬戶爪難等爲賊所殺伏誅籍阿合馬馬駝牛羊
驢等三千七百五十八追治阿合馬罪剖棺戮其尸

於通玄門外罷南京宣慰司及江南財賦總管府丁
卯降各省給驛璽書戊辰併江西福建行省去江南
冗濫官免福建山縣鎮店宣課禁當路私人權府州
司縣官招諭畬洞人免其罪禁差戍軍防送禁人匠
提舉擅招匠戶已遣浙西道宣慰司同知劉宣等
理筭各鹽運司及財賦府茶場都轉運司出納之數
籍阿合馬妻子親屬所營資產其奴婢縱之爲民罷
宣慰使所帶相銜壬申鎖繫耿仁至大都命中書省
鞠之庚辰議於平瀾州造船發軍民合九千人令探
馬赤伯要帶領之伐木於山及取於寺觀墳墓官酬

其直仍命葉哥遣人督之癸未給大都拔都兒正軍
夏衣和禮霍孫言省部濫官七百十四員其無過者
五百八十一員姑存之沁海左副都元帥石國英請
以稅戶贍軍軍逃死者令其補足站戶苗稅貧富不
均者宜均其役又請行鹽法汰官吏罷捕戶詔中書
集議行之張惠阿里罷以甘肅行省左丞麥木丁爲
中書右丞行御史臺御史中丞張雄飛叅知政事乙
酉元帥綦公直言乞黜逃軍仍使從軍及設立冶場
於別十八里鼓鑄農器從之丙戌別十八里城東三
百餘里蝗害麥六月己丑朔日有食之芝生眉州甲

午阿合馬濫設官府二百四所詔存者三十三餘皆
罷又江南宣慰司十五道內四道已立行中書省罷
之乙未發六盤山屯田軍七百七十人以補劉恩之
軍敕宣慰司等官毋役官軍丙申發射士百人衛丞
相他人不得援例戊戌以占城旣服復叛發淮浙福
建湖廣軍五千海船百艘戰船二百五十命唆都爲
將討之亡宋軍有手號及無手號者並聽爲民己亥
命何子志爲管軍萬戶使暹國辛丑籍阿合馬妻子
壻奴婢財產癸卯禁濫保軍功乙巳招無籍軍給衣
糧己酉賞太子府宿衛軍禦盜之功給鈔馬有差無

妻者以沒官寡婦配之以阿合馬居第賜和禮霍孫
壬子申敕中外百官立限決事癸丑從和禮霍孫言
罷司徒府及農政院鎖繫忽辛赴揚州鞠治丁巳征
亦奚不薛盡平其地立三路達魯花赤留軍鎮守命
藥刺海總之以也速帶兒爲都元帥宣慰使秋七月
戊午朔日有食之立行樞密院於揚州鄂州庚申命
行御史臺揀汰各道按察司官辛酉剖郝禎棺戮其
尸壬戌命以官錢給戍軍費而以各奧魯所征還官
禁諸位下營運錢貨差軍護送高麗國王請自造船
一百五十艘助征日本戊辰征鴨池回軍屯田安西

以鈔給之庚午令蒙古軍守江南者更番還家壬申
發察罕腦兒軍千人治晉山道立馬湖路總管府癸
酉賜高麗王王瞻金印癸酉宣慰孟慶元萬戶孫勝
夫使爪哇回爲忙古帶所囚詔釋之丁丑罷汪札刺
兒帶總帥收其制命虎符以鞏昌路達魯花赤別速
帖木兒爲鞏昌平涼等處二十四處軍前便宜都總
帥府達魯花赤以蒙古人孛羅領湖北辰沅等州淘
金事戊寅議築阿失谷不速皇城樞密院言用木十
二萬地遠難致依察罕腦兒築土爲牆便從之乙酉
賜諸王塔海帖木兒忽都帖木兒等金銀幣帛有差

闍婆國貢金佛塔發米賑乞里吉思貧民八月丁亥
朔給乾山造船軍匠冬衣及新附軍鈔庚寅忙古帶
征羅氏鬼國還仍佩虎符爲管軍萬戶辛卯以阿八
赤督運糧癸巳發羅羅斯等軍助征緬國辛亥併淄
萊路田索二鎮仍於驛臺立新城縣治大駕駐蹕龍
虎臺江南水民饑者衆真定以南旱民多流移和禮
霍孫請所在官司發廩以賑從之申嚴以金飾車馬
服御之禁又禁諸監官不得令人匠私造器物甲寅
聖誕節是日還宮乙卯御正殿授皇太子諸王百官
朝賀丙辰謫捏兀迭納戍占城以贖罪九月丁巳朔

元皇本紀卷第三
賑真定饑民其流移江南者官給之糧使還鄉里敕
中書省窮治阿合馬之黨別速帶請於羅卜閣里輝
立驛從之以阿合馬沒官田產充屯田籍阿里家戊
午誅阿合馬第三子阿散仍剝其皮以徇庚申汰冗
官游顯乞罷漣海州屯田以其事隸管民官從其請
仍以顯平章政事行省楊州福建宣慰司獲倭國謀
者有旨留之辛酉誅耿仁撒都魯丁及阿合馬第四
子忻都招討使楊庭堅招撫海外南番皆遣使來貢
俱藍國主遣使奉表進寶貨黑猿一那旺國主忙昂
以其國無識字者遣使四人不奉表蘇木都速國主

上漢八的亦遣使二人蘇木達國相臣那里八合刺
攤赤因事在俱藍國聞詔代其主打古兒遣使奉表
進指環印花綺段及錦衾二十合寓俱藍國也里可
溫主兀咱兒撒里馬亦遣使奉表進七寶項牌一藥
物二瓶又管領木速蠻馬合馬亦遣使奉表同日起
闕壬戌禁諸人不得沮撓課程敕官吏受賄及倉庫
官侵盜臺察官知而不糾者驗其輕重罪之中外官
吏贓罪輕者杖決重者處死言官緘默與受贓者一
體論罪仍詔諭天下乙丑簽亦奚不薛等處軍丁卯
安南國進貢犀兕金銀器香藥等物增給元帥棊公

直軍冬衣鈔已巳命軍站戶出錢助民和顧和買籍
雲南新附戶自兀良合帶鎮雲南凡八籍民戶四籍
民田民以爲病至是令已籍者勿動新附者籍之定
雲南稅賦用金爲則以貝子折納每金一錢直貝子
二十索罷雲南宣慰司壬申敕平灤高麗耽羅及楊
州隆興泉州共造大小船三千艘亦奚不薛之北蠻
洞向世雄兄弟及散毛諸洞叛命四川行省就遣亦
奚不薛軍前往招撫之使與其主偕來癸酉阿合馬
姪宰奴丁伏誅罷忽辛黨馬璘江淮行省叅知政事
丁亥遣使括雲南所產金以孛羅爲打金洞達魯花

赤戊寅給新附軍賈祐衣糧祐言爲日本國焦元帥
壻知江南造船遣其來候動靜軍馬壓境願先降附
辛巳敕各行省止用印一餘者拘之及拘諸位下印
發鈔三萬錠於隆興德興府宣德州和糴糧九萬石
壬申賜諸王阿只吉金五千兩銀五萬兩釐正選法
置黑簿以籍阿合馬黨人之名令諸路歲貢儒吏各
一人各道提刑按察司舉廉能者陞等遷叙冬十月
丁亥朔增兩浙鹽價詔整治鈔法己丑敕河西僧道
也里可溫有妻室者同民納稅庚寅以歲事不登聽
諸軍捕獵於汴梁之南辛卯以平章軍國重事監修

國史耶律鑄爲中書左丞相壬辰享于太廟罷西京
宣慰司丙申初立詹事院以完澤爲右詹事賽陽爲
左詹事由大都至中灤中灤至瓜州設南北兩漕運
司立蘆臺越支三义沽鹽使司河間滄清山東濱樂
安及膠萊莒密鹽使司五敕籍沒財物精好者及金
銀幣帛入內帑餘付刑部以待給賜禁中出納分三
庫御用寶玉遠方珍異隸內藏金銀只孫衣段隸右
藏常課衣段綺羅縑布隸左藏設官吏掌鑰者三十
二人仍以宦者二十二入董其事減大府監官癸卯
命崔彧等鉤考樞密院文卷甲辰占城國納款使回

賜以衣服乙巳遣阿朮招降法里郎阿魯乾伯等國
罷屯田總管府以其事隸樞密院令管軍萬戶兼之
丙午以汪惟孝爲總帥丁未女直六十自請造船運
糧赴鬼國贍軍從之議征义巴洞庚戌以四川民僅
十二萬戶所設官府二百五十餘令四川行省議減
之移成都宣慰司於碉門罷利州及順慶府宣慰司
禁大都及山北州郡酒詔兩廣福建五品以下官從
行省就便銓注耶律鑄言有司官吏以采室女乘時
害民如令大郡歲取三人小郡二人擇其可者厚賜
其父母否則遣還爲宜從之籍京畿隱漏田履畝收

稅命游顯專領江浙行省漕運乙卯命堅童專掌奏
記誅阿合馬長子忽辛第二子抹速忽於揚州皆醢
之十一月戊午上都建利用庫賜太常禮樂籍田等
三百六十戶鈔千二百錠甲子給欠州屯田軍衣服
丁卯給河林戍還軍校銀鈔幣帛江南襲封衍聖公
孔洙入覲以爲國子祭酒兼提舉浙東道學校事就
給俸祿與護持林廟璽書詔以阿合馬罪惡頒告中
外凡民間利病即與興除之壬申以勢家爲商賈者
阻遏官民船立沁河巡禁軍犯者沒其家癸酉分元
帥綦公直軍戍曲先甲戌中書省臣言天下重囚除

謀反大逆殺祖父母父母妻殺夫奴殺主因姦殺夫
並正典刑外餘犯死罪者令充日本占城緬國軍從
之改鑄省印丙子四川行省招諭大盤洞主向臭反
等來朝戊寅耶律鑄言前奉詔殺人者死仍徵燒埋
銀五十兩後止徵鈔二錠其事太輕臣等議依蒙古
人例犯者沒一女入仇家無女者徵鈔四錠從之以
袁州饒州興國軍復隸隆興省馬入兒國遣使以金
葉書及土物來貢罷都功德使脫烈其修設佛事妄
費官物皆徵還之賜貧乏者合納塔兒八只等羊馬
鈔十二月丁亥命阿剌海領范文虎等所有海船三

百艘壬寅中書左丞張文謙為樞密副使乙未中書
省臣言平原都公趙與芮瀛國公趙鼎翰林直學士
趙與票宜並居上都帝曰與芮老矣當留大都餘如
所言繼有旨給瀛國公衣糧發遣之唯與票勿行以
中山薛保住上匿名書告變殺宋丞相文天祥癸卯
御史中丞崔彥言臺臣於國家政事得失生民休戚
百官邪正雖王公將相亦宜糾察近唯御史有言臣
以為臺官皆當建言庶於國家有補選用臺察官若
由中書必有徧徇之弊御史宜從本臺選擇初用漢
人十六員今用蒙古人十六員相參巡歷為宜從之

浚濟川河降拱衛司復正四品仍收其虎符罷湖廣
行省金銀鐵冶提舉司以其事隸各路總管府以建
康淘金總管府隸建康路中書右丞札散為平章政
事罷解鹽司及諸鹽司令運司官親行調度鹽引罷
南京屯田總管府以其事隸南陽府阿里海牙復鎮
遠軍發軍千人戍守以其地與西川行省接就以隸
焉詔立帝師答耳麻八剌剌吉塔掌玉印統領諸國
釋教造帝師八合思八舍利塔免鞏昌等處積年所
欠田租稅課賜皇子北安王位下塔察兒等馬牛羊
各有差

二十年春正月丙辰朔高麗國王王賸遣其大將軍
俞洪慎來賀己未納皇后弘吉刺氏辛酉賜諸王出
伯印賞諸王必赤帖木兒駙馬昌吉軍鈔諸王公
主駙馬得江南分地者於一萬戶田租中輸鈔百錠
准中原五戶絲數癸亥敕藥刺海領軍征緬國乙丑
高麗國王王賸遣使兀刺帶貢氎布線紬等物四百
段和禮霍孫言去冬中山府奸民薛寶住爲匿名書
來上妄効東方朔書欺罔朝廷希覬官賞敕誅之又
言自今應訴事者必須實書其事赴省臺陳告其敢
以匿名書告事重者處死輕者流遠方能發其事者

給犯人妻子仍以鈔賞之又阿合馬專政時衙門太
冗虛費俸祿宜依劉秉忠許衡所定併省爲便皆從
之設務農司敕諸事赴省臺訴之理決不平者許詣
登聞鼓院擊鼓以聞預備征日本軍糧令高麗國備
二十萬石以阿塔海依舊爲征東行中書省丞相丙
寅發五衛軍二萬人征日本發鈔三千錠糴糧于察
罕腦兒以給軍匠以燕南河北山東諸郡去歲旱稅
糧之在民者權停勿徵仍諭自今管民官凡有災傷
過時不申及按察司不即行視者皆罪之刑部尚書
崔彥言時政十八事詔中書省與御史大夫王速帖

木兒議行之罷上都回易庫丁卯伯要帶等伐船材于烈塌都山乾山凡十四萬二千有奇起諸軍貼戶年及丁者五千人民夫三千人運之己巳太陰犯軒轅御女賜諸王也里干塔納合奴木赤金各五十兩金衣襖一庚午以平灤造船去運木所遠民疲於役徙於陽河造之壬申御史臺言燕南山東河北去年旱災按察司已嘗閱視而中書不為奏免民何以堪請權停稅糧制曰可移鞏昌按察司治甘州命右丞閣里帖木兒及萬戶三十五人蒙古軍習舟師者二千人探馬赤萬人習水戰者五百人征日本丁丑以招

討楊廷璧為宣慰使賜弓矢鞍勒使諭俱藍等國己卯命諸軍習舟楫給鈔八千錠於隆興宣德等處和糴以贍之庚辰太陰入南斗壬午車駕畋于近郊以四川歸附官楊文安為荆南道宣慰使改廣東提刑按察司為海北廣東道廣西按察司為廣西海北道福建按察司為福建閩海道鞏昌按察司為河西隴北道癸未撥忽蘭及塔刺不罕等四千戶隸皇太子位下壬戌敕於禿烈禿等富戶內貸牛六百頭給乞里古思之貧乏者二月戊子定兩廣四川戍軍二三年一更廩其家屬軍官給俸以贍之賜俱藍國王瓦你

金符賜駙馬阿禿江南民千戶以春秋仲月上戊日
祭社稷及武成王庚寅太陰掩昴癸巳敕斡脫錢仍其
舊丁酉給別十八里屯田軍戰襖庚子敕權貴所占
田土量給各戶之外餘者悉以與怯薛帶等耕之減
四川官府併西川東西北三道宣慰司及潼川等路
鎮守萬戶府新軍總管府威灌茂等州安撫司十四
處是夜太白犯昴辛丑定軍官選格立官吏賊罪法
壬寅太白犯昴乙巳令隆興行省遣軍護送占城糧
船太陰犯心丁未定安洞酋長遣其兄弟入覲敕給驛
馬已酉陞闡遺監秩正五品癸丑諭中書省大事奉

聞小事便宜行之毋致稽緩甲寅降太醫院爲尚醫
監改給銅印立江南等處官醫提舉司賜日本軍官
八忽帶及軍士銀鈔有差敕遣官錄揚州囚徒三月
丁巳諸王勝納合兒設王府官三員以萬戶不都蠻
鎮守金齒罷女直造日本出征船罷河西行御史臺立
鞏昌等處行工部罷福建市舶總管府存提舉司併
泉州行省入福建行省免福建歸附後未徵苗稅以
闡闡你敦治江淮行省或言其過命兀奴忽帶伯顏
佐之戊午以新附洞蠻酋長爲千戶己未歲星犯鍵
閉罷京兆行省立行工部御史臺臣言平灤造船五

臺山造寺伐木及南城建新寺凡役四萬人乞罷之
詔伐木建寺即罷之造船一事其與省臣議前後衛
軍自願征日本者命選留五衛漢軍千餘其新附軍
令悉行庚申太陰犯井辛酉賞諸王合班第忙兀帶所
部軍士戰功銀鈔幣帛衣服各有差給甘州戍軍鈔
壬戌太陰犯鬼乙丑命兀奴忽魯帶往揚州錄囚遣江
北重囚謫征日本立雲南按察司照刷行省文卷罷
淮安等處淘金官惟計戶取金以阿合馬綿綃絲線
給貧民工匠給王傳兀訥忽帖只印給西川福建兩
廣之任官驛馬以湖南宣慰使張鼎新行省叅知政

事樊楫等嘗阿附阿里海牙救罷之丙寅車駕幸上
都江西行省叅政完顏那懷坐越例驟陞及妄舉一
百九十八人入官罷之罷河西辦課提舉司丁卯增
置蒙古監察御史六員乙巳歲星犯房癸酉歲星掩
房廣州新會縣林桂方趙良鈐等聚衆僞號羅平國
稱延康年號官軍擒之伏誅餘黨悉平乙亥罷諸處
役夫遣阿塔海戍曲先漢都魯迷失帥甘州新附軍
往幹端己卯給各衛軍出征馬價鈔辛巳立畏吾兒
四處驛及交鈔庫壬午祀太一罷福建道宣慰司復
立行中書省于漳州以中書右丞張惠爲平章政事

御史中丞也先帖木兒爲中書左丞並行中書省事
賜迷里札蠻合八失鈔賧八魯怯薛八刺合赤等貧
乏賜皇子北平王所部馬牛羊各有差夏四月丙戌
立別十八里和州等處宣慰司庚寅敕藥刺海戍守
亦奚不薛都元帥也速荅兒還自亦奚不薛駐軍成
都求入見許之仍遣人屯守險隘以侍衛親軍二萬
人助征日本辛卯樞密院臣言蒙古侍衛軍於新城
等處屯田砂礫不可種乞改撥良田從之壬辰阿塔
海求軍官習舟楫者同征日本命元帥張林招討張
瑄總管朱清等行以高麗王就領行省規畫日本事

宜甲午減江南諸道醫學提舉司四省各存其一免
京畿所括豪勢田舊稅三之二新稅三之一高麗國
王王曙請以蒙古人同行省事禁近侍爲人求官素
亂選法申嚴酒禁有私造者財產女子沒官犯人配
役申私益之禁許按察司糾察鹽司己亥太陰犯房
壬寅太陰犯南斗癸卯授高麗國王王曙征東行中
書省左丞相仍駙馬高麗國王乙巳命樞密院集軍
官議征日本事宜程鵬飛請明賞罰有功者軍前給
憑驗候班師日改授從之庚戌右丞也速帶兒招撫
筠連州定州阿永都掌等處蠻獨山都掌蠻不降進

元史本紀卷第三
軍討之生擒酋長得蘭紐遂班師發大都所造回回
砲及其匠張林等付征東行省辛亥以征日本給後
衛軍衣甲及大名衛輝新附軍鈔麥木丁等檢覈萬
億庫以罪監繫者多請付蒙古人治有旨蒙古人爲
利所汨亦異往日矣其擇可任者使之五月乙卯給
甘州戍軍夏衣戊午丞相伯顏諸王相吾荅兒等言
征緬國軍宜參用蒙古新附軍從之己未免五衛軍
征日本發萬人赴上都縱平瀾造船軍歸耕撥大都
見管軍代役庚申減隆興府昌州蓋里泊管鹽官吏
九十九人以其事隸隆興府定江南民官及轉運司

官公田甲子徙揚州淘金夫赴益都立征東行中書
省以高麗國王與阿塔海共事給高麗國征日本軍
衣甲御史中丞崔或言江南盜賊相繼而起皆緣拘
水手造海船民不聊生日本之役宜姑止之江南四
省應辦軍需宜量民力勿強以土產所無凡給物價
及民者必以實召募平水當從所欲伺民之氣稍蘇
我之力粗備三二年復東征未晚不從丙寅太陰掩
心東星免江南稅糧三之二敕阿里海牙調漢軍七
千新附軍八千以付唆都從征辛未占城行省已破
占城其國主補底遁去降璽書招徠之甲戌發征日

本重囚徃占城緬國等處從征設高麗國勸農官四員丙子詔諭諸王相吾答兒先是雲南重囚令便宜處決恐濫及無辜自今凡大辟罪仍須待報併省江淮雲南州郡以耶律老哥爲中書叅知政事免戍軍差稅禁諸王奧魯官科擾軍戶以西南蠻夷有謀叛未附者免西川征緬軍令專守禦支錢令各驛供給戍寅諸陳言者從都省集議可行者以聞不可則明以諭言者許按察司官用弓矢監察御史阿刺渾坐擅免贓錢不糾私釀等罪罷用御史中丞崔或言罷各路選取室女頒行宋文思院小口斛款以陝西按

察司贓罰錢輸於秦王省北京提刑按察司副使僉事各一員立海西遼東提刑按察司按治女直水達達部己卯酬諸王只必帖木兒給軍羊馬鈔十萬錠海南四州宣慰使朱國寶請益兵討占城國主詔以阿里海牙軍萬五千人應之用王積翁言詔江南運糧於阿八赤新開神山河及海道兩道運之立幹脫總管府辛巳給占城行省唆都弓矢甲仗六月丙戌申嚴私易金銀之禁以甘州行省叅政王倚爲中書叅知政事免大都及平灤路今歲絲料江南遷轉官不之任者杖之追奪所受宣勅戊子以征日本民間

騷動盜賊竊發忽都帖木兒忙古帶乞益兵禦寇詔以興國江州軍付之己丑增官吏俸給庚寅定市舶抽分例舶貨精者取十之一粗者十之五差五衛軍人修築行殿外垣命諸王忽牙都設斷事官丙申發軍修完大都城辛丑發軍修築隄堰戊申用伯顏等言所括宋手號軍八萬三千六百人立牌甲設官以統之仍給衣糧庚戌沅叛賊陳吊眼叔陳桂龍於慙荅孫之地辛亥四川行省叅政曲立吉思等討平九溪十八洞以其酋長赴闕定其地立州縣聽順元路宣慰司節制以向世雄等爲義巴諸洞安撫大使及

安撫使秋七月癸丑朔蠲建寧路至元十七年前未納苗稅丙辰免徵骨菟軍賦諭阿塔海所造征日本船宜少緩之所拘商船其悉給還阿里沙坐虛言惑衆誅太白犯井丁巳賜捏古帶等珠衣庚申調軍益戍雲南丙寅立亦奚不薛宣慰司益兵戍守開雲南驛路分亦奚不薛地爲三設官撫治之癸亥太陰犯南斗乙丑太白犯井丁卯罷淮南淘金司以其戶還民籍庚午熒惑犯司怪新附官周文英入見其贄禮銀萬兩金四十錠鐵木兒不花匿爲已有詔即其家搜閱没入官帑敕捕阿合馬婦翁尚書蔡仲英徵償

所貸官鈔二十萬錠阿八赤姚演以開神山橋渠侵
用官鈔二千四百錠折闕糧米七十三萬石詔徵償
仍議其罪壬申亦奚不薛軍民千戶宋添富及順元
路軍民總管兼宣撫司阿里等來降班師以羅鬼酋
長阿利及其從者八覲立亦奚不薛總管府命阿里
爲總管丙子減江南十道宣慰司官一百四十員爲
九十三員敕上都商稅六十分取一免大都平灤兩
路今歲俸鈔立總教院秩正三品丁丑命按察司照
刷吐蕃宣慰司文卷立鋪軍捕淮西盜賊淮東宣慰
同知宋廷秀私役軍四十人杖而罷之庚辰給忽都

帖木兒等軍貧乏償怯兒合思等羊馬價鈔八月癸
未以明理察平章軍國重事商議公事立懷來淘金
所甲午敕大名真定北京衛輝四路屯駐新附軍於
東京屯田安南國遣使以方物入貢丙午太白犯軒
轅丁未歲星犯鈞鈐浙西道宣慰使史弼言頃以征
日本船五百艘科諸民間民病之宜取阿八赤所有
船修理以付阿塔海庶寬民力并給鈔於沿海募水
手從之濟州新開河成立都漕運司庚戌賞還役宿
衛軍賜皇子北安王所部軍鈔羊馬九月壬子太白
犯軒轅少女戊午合刺帶等招降象山縣海賊尤宗

祖等九千五百九十二人海道以寧太陰犯斗壬戌
調黎兵同征日本丙寅古荅奴國因商人阿刺畏等
來言自願効順併占城荆湖行省爲一徙舊城市肆
局院稅務皆入大都減稅徵四十分之一賞朱雲龍
漕運功授七品總押仍以幣帛給之己巳太白犯右
執法辛未以歲登開諸路酒禁廣東盜起遣兵萬人
討之壬申太陰掩井癸酉熒惑犯鬼甲戌太陰犯鬼
熒惑犯積尸氣太白犯左執法戊寅史弼陳弭盜之
策爲首及同謀者死餘屯田淮上帝然其言詔以其
事付弼賊黨耕種內地其妻奴送京師以給鷹坊人

等冬十月庚寅給征日本新附軍鈔三萬錠壬辰車
駕由古北口路至自上都癸巳韓端宣慰使劉恩進
嘉禾同穎九穗七穗六穗者各一甲午以平章政事
札散爲樞密副使詔五衛軍歲以冬十月聽十之五
還家備資裝正月番上代其半還四月畢入役時各
衛議先遣七人而以三人自代從之乙未享于太廟
丙申太陰犯昴丁酉誅占城逃回軍忙兀帶請增蒙
古漢軍戍邊從之以忽都忽總揚州行省唆都新益
軍庚子許阿速帶軍以兄弟代役建寧路管軍總管
黃華叛衆幾十萬號頭陀軍僞稱宋祥興五年犯崇

元史本紀卷第三十二
三
安浦城等縣圍建寧府詔卜憐吉帶史弼等將兵二
萬二千人討平之耶律鑄罷壬寅立東阿至御河水
陸驛以便運徙濟州潭口驛於新河魯橋鎮給甘
州納硃黃貧乏戶鈔癸卯諸王只必帖木兒請括閱
常德府分地民戶不許中書省臣言阿八赤新開河
二處皆有倉宜造小船分海運從之中書省臣言押
亦迷失嘗請諭江南諸郡募入種淮南田今乃往各
郡轉收民戶行省官闊闊你敦言其非便宜令其於
治所召募不可強民從之戊申給水達達鰥寡孤獨
者絹千匹鈔三百錠立和林平準庫遣官檢覈益都

淘金欺弊罷中興管課提舉司及北京鹽鐵課程提
舉司己酉簽河西質子軍年及丁者充軍庚戌各道
提刑按察司增設判官二員十一月壬子賞太不花
脫歡等戰功銀幣癸丑總管陳義願自備海船三十
艘以備征進詔授義萬戶佩虎符義初名五虎起自
海盜內附後其兄為招討義為總管敕凡盜賊必由
管民官鞠問仍不許私和丁巳命各省印授時曆諸
王只必帖木兒請於分地二十四城自設管課官不
從又請立拘權課稅所其長從都省所定次則王府
差設從之詔大都田土並令輸稅甘州新括田土畝

元史本紀卷第三十一
五
輸租三升己未吏部尚書劉好禮以吉利吉思風俗
事宜來上壬戌復立南京宣慰司乙丑罷開城路屯
田總管府入開城路隸京兆宣慰司戊辰立司農司
掌官田邸舍人民給諸王所部撒合兒兀魯等羊馬
以賙其乏河西官府參用漢人徙甘肅沙州民戶復
業大都城門設門尉丁丑禁雲南管課官於常額外
多取餘錢戊寅禁雲南權勢多取債息仍禁沒人口
爲奴及黥其面者太白歲星相犯己卯從諸王朮白
蒙古帶等請賞也禿古等銀鈔以旌戰功賜皇太子
鈔千錠以御史臺贓罰鈔賜怯憐口十二月庚辰賜

諸王渾都帖本兒衣物忽都兒所部軍銀鈔幣帛甲
申賜別速帶所部軍衣服幣帛七千馬二千賞西番
軍官愛納八斯等戰功辛卯以茶忽所管軍六千人
備征日本壬辰給諸王阿只吉牛價以中書參議溫
迪罕禿魯花廉貧不阿附權勢賜鈔百錠罷女直出
產金銀禁甲午給鈔四萬錠和糴于上都給司閹衛
士貧者人鈔二十錠辛丑賜諸王昔烈門等銀以海
道運糧招討使朱清爲中萬戶賜虎符張瑄子文虎
爲千戶賜金符徙新附官仕內郡以蠡州還隸真定
府路癸卯發粟賑水達達四十九站甲辰太陰掩熒

元史本紀卷第十三
三十五
惑丙午罷雲南造賣金箔規措所罷雲南都元帥府
及重設官吏定質子令凡大官子弟遣赴京師戊申
雲南施州子童興兵爲亂敕叅知政事阿合八失帥
兵合羅羅斯脫兒世合討之給布萬匹賑女直飢民
一千戶是歲斲死罪二百七十八人

本紀卷第十二

本紀卷第十三

元史十三

翰林學士中奏知制誥兼修國史吳棫翰林侍制承直郎知制誥兼國史院編修官臣王禕等奉
勅修

世祖十

二十一年春正月乙卯帝御大明殿右丞相和禮霍
孫率百官奉玉冊玉寶上尊號曰憲天述道仁文義
武太光孝皇帝諸王百官朝賀如朔旦儀赦天下丁
巳勅自今凡奏事者必先語同列以所奏既奏其所
奉旨云何令同列知而後書之簿不明以告而輒書
簿者杖必闌赤己未罷雲南都元帥府所管軍民隸

行省甲子罷揚州等處理筭官以其事付行省江浙
行省平章忙忽帶進真珠百斤丙寅閣閣你敦言屯
田芍陂兵二千布種二千石得粳糯二萬五千石有
奇乞增新附軍二千從之丁卯建都王烏蒙及金齒
一十二處俱降建都先為緬所制欲降未能時諸王
相吾答兒及行省右丞太卜叅知政事也罕的斤分
道征緬於阿昔阿禾两江造舡二百艘順流攻之按
江頭城令都元帥袁世安戍之遂遣使招諭緬王不
應建都太公城乃其巢穴遂水陸並進攻太公城拔
之故至是皆降庚午立江淮荆湖江西四川行樞密

院治建康鄂州撫州成都立耽羅國安撫司辛未相
吾答兒遣使進緬國所貢珍珠珊瑚異綵及七寶束
帶甲戌遣蒙古官及翰林院官各一人祠岳瀆后土
遣王積翁賚詔使日本賜錦衣玉環鞍轡積翁由慶
元航海至日本近境為舟人所害御史臺臣言罪黜
之人久忘其名又復奏用乞戒約帝曰卿等所言固
是然其間豈無罪輕可錄用者御史大夫王速帖木
兒對曰以各人所犯罪狀明白敷奏用否當取聖裁
從之丙子建寧叛賊黃華自殺丁丑雲南諸路按察
司官陞辭詔諭之曰卿至彼當宣明朕意勿求貨財

名成則貨財隨之，徇財則必失其名，而性命亦不可保矣。己卯，馬八兒國遣使貢珍珠異寶，縑段。二月，辛巳，以福建宣慰使管如德爲泉州行省參知政事。征緬浚揚州漕河，罷高麗造征日本船。丁亥，命翰林學士承旨撒里蠻祀先農，于籍田。壬辰，以江西叛寇妻子賜鷹坊養虎者，以別速帶逃軍七百餘人付安西王屯田，給以牛具。邕州賓州民黃大成等叛，梧州韶州衡州民相挺而起。湖南宣慰使撒里蠻將兵討之。甲午，罷羣牧所。己亥，瑞州獲叛民晏順等三十二人，并妻孥送京師。罷阿八赤開河之役，以其軍及水手

各萬人運海道糧放檀州淘金五百人還家。丁未，括江南樂工，命阿塔海發兵萬五千人，船二百艘助征。占城船不足，命江西省益之。戊申，徙江淮行省于杭州，徙浙西宣慰司于平江省。黃州宣慰司入淮西道。立法輪竿于大內，萬壽山高百尺，漳州盜起，命江浙行省調兵進討。秦州總管劉發有罪，嘗欲歸黃華，事覺伏誅。遷故宋宗室及其大臣之仕者於內地。三月，辛亥，敕思播管軍民官自今勿遷。丁巳，皇子北平王南木合至自北邊。王以至元八年建幕庭于和林北野里麻里之地，留七年。至是始歸。右丞相安童繼至。

元史本紀卷第三十三
三
以張弘範等將新附軍壬戌更定虎符丙寅乘輿幸上都丁卯太廟正殿成奉安神主甲戌置潮贛吉撫建昌戍兵乙亥高麗國王王暎以皇帝尊號禮成遣使來賀夏四月壬午令軍民同築堤堰以利五衛屯田乙酉省泉府司入戶部立大都留守司兼少府監立大都路總管府立西川延安鳳翔興元宣課司從迷里火者蜜刺里等言以鈔萬錠爲市於別十八里及河西上都以火者赤依舊揚州鹽運使歲市鹽八十萬石以贖過己亥涿州巨馬河決衝突三十餘里庚子湖廣行省平章阿里海牙請身至海濱收集占

城散軍復使南征且趣其未行者許之壬寅江淮行省進各翼童男女百人忽都鐵木兒征緬之師爲賊衝潰戊申高麗王王暎及公主以其世子諫來朝勅發思播田楊二家軍二千從征緬籍江南鹽徒軍蔽匿者有罪火兒忽等所部民戶告飢帝曰飢民不救儲糧何爲發萬石賑之命開元等路宣慰司造船百艘付狗國戍軍雲南行省爲破緬國江頭城進童男女八十人并銀器幣帛五月己酉從禿禿合言立二千戶總欽察康里子弟願爲國宣勞者壬子拘征東省印癸丑樞密院臣言唆都潰軍已令李恒收集江

元史本紀卷之三
四
淮江西兩省潰軍別遣使招諭凡至者皆給之糧舟
楫損者修之以俟阿里海牙調用從之戊午勅中書
省奏日及文冊皆不許用畏吾字其宣命劄付並用
蒙古書己未荆湖占城行省言忽都虎忽馬兒等將
兵征占城前鋒舟師至舒眉蓮港不知所向令萬戶
劉君慶進軍次新州獲占蠻始知我軍已還矣就遣
占蠻向導至占城境其國主遣阿不蘭以書降且言
其國經唆都軍馬虜掠國計已空俟來歲遣嫡子以
方物進繼遣其孫路司理勒螫等奉表詣闕乙丑取
高麗所產鐵蠟江南今年田賦十分之二其十八年

已前逋欠未徵者盡免之阿魯忽奴言曩於江南民
戶中撥匠戶三十萬其無藝業者多今已選定諸色
工匠餘十九萬九百餘戶宜縱令爲民從之詔諭各
道提刑按察司分司事宜庚午荆湖占城行省以兵
進據烏馬境地近安南請益兵命鄂州達魯花赤趙
翥等奉璽書往諭安南河間任丘縣民李移住謀叛
事覺伏誅括天下私藏天文圖讖太乙雷公式七曜
曆推背圖苗太監曆有私習及收匿者罪之丁丑忽
都虎烏馬兒劉萬戶等率揚州省軍二萬赴唆都軍
前遇風船散其軍皆潰勅追烏馬兒等誥命虎符及

部將所受宣勅以河西李魯合荅兒等代之聽阿里
海牙節制閏五月己卯封法里刺王爲郡王佩虎符
改思播二州隸順元路宣撫司罷西南番安撫司立
總管府給西川蒙古軍鈔使備鎧仗耕遂寧泂江曠
土以食四頃以下者免輸地稅命總帥汪惟正括四
川民戶辛巳加封衛輝路小清河神曰洪濟威惠王
壬午蒙古侍衛親軍都指揮使八忽帶征黃華回進
人口百七十一乙酉以雲南境內洪城併察罕章隸
皇太子丙戌行御史臺自揚州遷于杭州庚寅賜歸
附洞蠻官十八人衣遣還癸巳賜北安王螭紐金印

罷皮貨所理筭江南諸行省造征日本船隱弊詔按
察司毋得沮撓甲辰安南國王世子陳日烜遣其中
大夫陳謙甫貢玉杯金瓶珠條金領及白猿綠鳩幣
帛等物丙午以侍衛親軍萬人修大都城六月壬子
遣使分道尋訪測驗晷景日月交食曆法增官吏俸
以十分爲率不及一釐者量增五分甲寅詔封皇子
脫歡爲鎮南王賜塗金銀印駐鄂州庚申改蒙古都
元帥府爲蒙古都萬戶府砲手元帥府爲砲手萬戶
府砲手都元帥府爲回回砲手軍匠萬戶府甲子命
也速帶兒所部軍六十人淘金雙城從憨荅孫請移

阿剌帶和林屯田軍與其所部相合屯田五河乙丑
中衛屯田蝗甲戌賜皇子愛牙赤怯薛帶孛折等及
兀刺海所部民戶鈔二萬一千六百四十三錠皇子
南木合怯薛帶怯憐口一萬二百四十六錠以馬一
萬一百九十五羊一萬六十賜朶魯朶海扎剌伊兒
所部貧軍秋七月丁丑朔勅荆湖西川兩省合兵討
义巴散毛洞蠻雲南省臣言騰越永昌羅必丹民心
攜貳宜令也速帶兒或汪總帥將兵討之制曰可命
樞密院差軍修大都城己卯立衍福司中書省臣言
宰相之名不宜輕授今占城省臣已及七人宜汰之

詔軍官勿帶相銜賜皇子比安王印復揚州管匠提
舉司丁亥江淮行省以占城所遣太半達連扎赴闕
及其地圖來上塔刺赤言頭輦哥國王出戌高麗調
旺速等所部軍四百以往今頭輦哥已回留軍耽羅
去其妻子已久宜令他軍更戌伯顏等議以高麗軍
千人屯耽羅其留戌四百人縱之還家從之戊子詔
鎮南王脫歡征占城遣所留安南使黎英等還其國
日烜遣其中大夫阮道學等以方物來獻總帥汪惟
正言一門兄弟從仕者衆乞仍於秦鞏州置便宜都
總帥府仍用元帥印即其兄弟四人擇一人爲總帥

總帥之下總管府令其兼之汪氏二人西川典兵者亦擇其一爲萬戶餘皆依例遷轉從之賜貧乏者阿魯渾玉龍帖木兒等鈔共七千四百八十錠八月丁未雲南行省言華帖白水江鹽井三處土老蠻叛殺諸王及行省使者調兵千人討之定擬軍官格例以河西回回畏吾兒等依各官品充萬戶府達魯花赤同蒙古人女直契丹同漢人若女直契丹生西北不通漢語者同蒙古人女直生長漢地同漢人已酉御史臺臣言無籍之軍願從軍殺掠者初假之以張渡江兵威今各持弓矢剽劫平民若不分隸各翼恐生

他變詔遣之還家辛亥征東招討司聶古帶言有旨進討骨嵬而阿里海牙朶剌帶玉典三軍皆後期七月之後海風方高糧仗船重深虞不測姑宜少緩從之占城國王乞回唆都軍願以土產歲修職貢使大盤亞羅日加翳大巴南等十一人奉表詣闕獻三象甲子放福建畬軍收其軍器其部長於近處州郡民官遷轉庚午車駕至自上都甲戌擗完上言建都女子沙智治道立站有功已授虎符管領其父元收附民爲萬戶今改建昌路總管仍佩虎符從之九月甲申京師地震併市舶司入鹽運司立福建等處鹽課

市舶都轉運司中書省言福建行省軍餉絕少必於揚州轉輸事多遲誤若併兩省爲一分命省臣治泉州爲便詔以中書右丞行省事忙兀台爲江淮等處行中書省平章政事其行省左丞忽刺出蒲壽庚參政管如德分省泉州癸巳太白犯南斗丙申以江南總攝楊璉真加發宋陵冢所收金銀寶器修天衣寺甲辰海南貢白虎獅子孔雀冬十月丁未享于太廟戊申四川行省言金齒遺民尚多未附以要刺海將探馬赤軍二千人討之已酉勅管軍萬戶爲行省宣慰使者毋兼管軍事仍爲萬戶者毋兼民政壬子

定漣海等處屯田法辛酉征東招討司以兵征骨嵬宋有手記軍死則以兄弟若子繼詔依漢軍籍之母文其手丁卯和禮霍孫請設科舉詔中書省議會和禮霍孫罷事遂寢以招討使張萬爲征緬招討使佩三珠虎符戊辰立常平倉以五十萬石價鈔給之甲戌詔諭行中書省凡征日本船及長年篙手並官給鈔增價募之賜貧乏者押失忻都察等鈔一萬四千三錠十一月甲申封南木里忙哥赤郡公戊子命北京宣慰司修灤河道己丑江西行省叅知政事也的迷失禽獲海盜黎德及招降餘黨百三十三人即其

地誅黎德以徇以黎德弟黎浩及僞招討吳興等檻
送京師遷轉官員薄而不就者其令歸農當役庚寅
占城國王遣使大羅盤亞羅日加翳等奉表來賀聖
誕節獻禮幣及象二占城舊州主寶嘉婁亦奉表入
附庚子以范文虎爲左丞商量樞密院事太陰犯心
辛丑和禮霍孫麥木丁張雄飛溫迪罕皆罷前右丞
相安童復爲右丞相前江西權茶運使盧世榮爲右
丞前御史中丞史樞爲左丞不魯迷失海牙撒的迷
失並叅知政事前戶部尚書拜降叅議中書省事勅
中書省整治鈔法定金銀價禁私自回易官吏奉行
不虔者罪之壬寅安童盧世榮言阿合馬專政時所
用大小官員例皆奏罷其間豈無通才宜擇可用者
仍用之詔依所言汰選毋徇私情癸卯福建行省遣
使人八合魯思招降南巫里別里刺理倫大力等四
國各遣其相奉表以方物來貢以江淮間自襄陽至
于東海多荒田命司農司立屯田法募人開耕免其六
年租稅并一切雜役賜蒙古貧乏者也里古薛列海
察吉兒等鈔十二萬四千七百二十二錠十二月甲
辰朔中書省臣言江南官田爲權豪寺觀欺隱者多
宜免其積年收入以日期聽人首實踰限爲人所

告者徵以其半給告者從之立常平鹽局乙巳崔或
言盧世榮不可爲相忤旨罷以丁壯萬人開神山河
立萬戶府以總之辛亥以儀鳳司隸衛尉院癸亥盧
世榮言京師富豪戶釀酒價高而味薄以致課不時
輸宜一切禁罷官自酤賣向之歲課一月可辦從之
甲子以高麗提舉司隸工部乙丑祀太一丙寅荆湖
占城行省遣八番劉繼昌諭降龍昌寧龍延萬等赴
闕奉羊馬白氊來貢各授本處安撫使立宣慰司招
撫西南諸蕃等處酋長癸酉命翰林承旨撒里蠻翰
林集賢大學士許國禎集諸路醫學教授增修本草

是月鎮南王軍至安南殺其守兵分六道以進安南
興道王以兵拒於萬劫進擊敗之萬戶倪閏戰死於
劉邨以涇州隸都總帥府賜蒙古貧乏者元馬兒等
鈔二十八百八十五錠銀四十錠

二十二年春正月戊寅以命相詔天下民間買賣金
銀懷孟諸路竹貨江淮以南江河魚利皆弛其禁諸
處站赤飲食官爲支給遣官諸路慮囚罪輕者釋之
徙屯衛輝新附軍六千家廩之京師以完倉廩發五
衛軍及新附軍濬蒙邨漕渠庚辰立別十八里驛傳
毀宋郊天臺桑哥言楊輦真加云會稽有泰寧寺宋

毀之以建寧宗等攢宮錢唐有龍華寺宋毀之以爲南郊皆勝地也宜復爲寺以爲皇上東宮祈壽時寧宗等攢宮已毀建寺救毀郊天臺亦建寺焉壬午詔立市舶都轉運司立上都等路羣牧都轉運使司諸路常平鹽鐵坑冶都轉運司甲申遣使代祀五岳四瀆東海后土戊子闕闕你敦言先有旨遣軍二千屯田爲陂試土之肥磽去秋已收米二萬餘石請增屯士二千人從之徙江南樂工八百家于京師封駙馬唆郎哥爲寧昌郡王賜龜紐銀印西川趙和尚自稱宋福王子廣王以誑民民有信者真定民劉驢兒有

三乳自以爲異謀不執事覺皆磔裂以徇移五條河屯田軍五百於兀失蠻扎失蠻辛卯發諸衛軍六千八百人給護國寺修造廣御史臺贓罰庫癸巳樞密臣言舊制四宿衛各選一人參決樞密院事請以脫列伯爲簽院從之詔括京師荒地令宿衛士耕種乙未中書省臣請以御史大夫玉速怙木兒爲左丞相中丞撒里蠻爲御史大夫罷行御史臺以其所屬按察司隸御史臺行御史臺大夫撥魯罕爲中書省平章政事帝曰玉速怙木兒朕當思之撥魯罕寬緩不可安童對曰阿必赤合何如帝曰此事朕自處之罷

行御史臺者當如所奏盧世榮請罷福建行中書省
立宣慰司隸江西行中書省又言江南行中書省事
繁恐致壅滯今隨行省立行樞密院總兵以分其務
爲便帝曰行院之事前日已言由阿合馬欲其子忽
辛兼兵柄而止今議行之流征占城擅還將帥二十
三人於遠方丙申帝畋于近郊陞武備監爲武備寺
尚醫監爲太醫院職俱三品陞六部爲二品以合必
赤合爲中書平章政事命禮部領會同館初外國使
至常令翰林院主之至是改正荆湖占城行省平叛
蠻百六十六洞詔禁私酒己亥分江浙行省所治南

康隸江西省辛丑以揚兀魯帶爲征骨菟招討使佩
二珠虎符壬寅造大樽於殿樽以木爲質銀內而金
外鏤爲雲龍高一丈七寸是月壬午烏馬兒領兵與
安南興道王遇擊敗之兵次富良江北乙酉安南世
子陳日烜領戰船千餘艘以拒丙戌與戰大破之日
烜遁去入其城還屯富良江北峻都唐古帶等引兵
與鎮南王會二月乙巳駐蹕柳林增濟州漕舟三千
艘後夫萬二千人初江淮歲漕米百萬石於京師海
運十萬石膠萊六十萬石而濟之所運三十萬石水
淺舟大恒不能達更以百石之舟舟用四人故夫數

增多塞渾河提決役夫四千人詔改江淮江西元帥
招討司爲上中下三萬戶府蒙古漢人新附諸軍相
叅作三十七翼上萬戶宿州蘄縣真定沂郟益都高
郵沁海七翼中萬戶棗陽十字路邳州鄧州杭州懷
州孟州真州八翼下萬戶常州鎮江潁州廬州亳州
安慶江陰水軍益都新軍湖州淮安壽春揚州泰州
弩手保甲處州上都新軍黃州安豐松江鎮江水軍
建康二十二翼翼設達魯花赤萬戶副萬戶各一人
以隸所在行院江西盜黎德等餘黨悉平以應放還
五衛軍穿河西務河舊例五衛軍十人爲率七人三
人分爲二番十月放七人者還正月復役正月放三
人者還四月復役更休息之丙午以荆湖行省所隸
八番羅甸隸西川行省分嵐管爲二州加封桑乾河
神洪濟公爲顯應洪濟公己酉爲皇孫阿難荅立衍
福司職四品使同知副使各一員辛亥廣東宣慰使
月的迷失討潮惠二州盜郭逢貴等四十五寨皆平
降民萬餘戶軍三千六百一十人請將所獲渠帥入
覲面陳事宜從之丙辰詔罷膠萊所鑿新河以軍萬
人隸江浙行省習水戰萬人載江淮米泛海由利津
達於京師辛酉御史臺臣言近中書奏罷行御史臺

改按察司爲提刑轉運司俾兼錢穀而糾彈之職廢矣請令安童與老臣議從之壬戌太陰犯心中書省臣盧世榮請立規措所經營錢穀秩五品所用官吏以善賈爲之勿限白身人帝從之叅知政事不魯迷失海牙等因奏世榮姻黨有牛姓者前爲提舉今浙西運司課程頗多擬陞轉運副使亦從之詔舊城居民之遷京城者以貲高及居職者爲先仍定制以地八畝爲一分其或地過八畝及力不能作室者皆不得冒據聽民作室陞御帶庫爲章佩監徒右千戶只兒海迷失分地泉州賜合刺失都兒新附民五千戶合刺赤阿速阿塔赤昔寶赤貴由赤等嘗從征者亦皆賜之以民八十戶賜皇太子宿衛臣嘗從征者用盧世榮言回買江南民土田詔天下拘收銅錢申禁私造酒麩戊辰車駕幸上都帝問省臣行御史臺何故罷之安童曰江南盜賊屢起行御史臺鎮遏居多臣以爲不可罷然與江浙行中書省並在杭州地甚遠僻徙之江州居江浙湖南江西三省之中爲便從之立真定濟南太原甘肅江西江淮湖廣等處宣慰司兼都轉運使司以治課程仍立條制禁諸司不得擅追管課官吏有敢沮擾者具姓名以聞增濟州漕

運司軍萬二千人立江西江淮湖廣造船提舉司令
江浙行省叅政馮珪湖廣行省右丞要東木叅政潘
傑龍興行省左丞伯顏叅政楊居寬簽省陳文福專
領課程事以竈吉刺帶爲中書左丞相己巳復立按
察司撥民二萬七千戶與駙馬唆郎哥以忽都魯爲
平章政事詔各道提刑按察司能遵奉條畫蒞事有
成者任滿升職賦污不稱任者罷黜除名詔立供膳
司職從五品達魯花赤令丞各一員罷融州總管府
爲州三月丙子遣太史監候張公禮彭質等往占城
測候日昃癸未罷甘州行中書省立宣慰司隸寧夏

行中書省荆湖占城行省請益兵時陳日烜所逃天
長長安二處兵力復集興道王船千餘艘聚萬劫阮
蓋在永平而官兵遠行久戰懸處其中唆都唐古帶
之兵又不以時至故請益兵帝以水行爲危令遵陸
以往庚子詔依舊制凡鹽一引四百斤價銀十兩以
拊今鈔爲二十貫商上都者六十而稅一增契本爲
三錢立上都規措所回易庫增壞鈔工墨費每貫二
分爲三分夏四月癸卯立行樞密院都鎮撫司置畏
兀驛六所丙午以征日本船運糧江淮及教軍水戰
庚戌監察御史陳天祥劾中書右丞盧世榮罪惡詔

世榮天祥皆赴上都壬子江陵民張二妻鄧氏一產
三男癸丑詔追捕宋廣王及陳宜中遣中書省樞密
院御史臺官各一員決大都及諸路罪囚大都汴梁
益都廬州河間濟寧歸德保定蝗辛酉以耽羅所造
征日本船百艘賜高麗壬戌御史中丞阿剌忒木兒
郭佑侍御史白禿剌忒木兒參知政事撒的迷失等
以廬世榮所招罪狀奏阿剌忒木兒等與世榮對於
帝前世榮悉欵服改六部依舊爲三品詔安童與諸
老臣議世榮所行當罷者罷之更者更之其所用人
實無罪者朕自裁決癸亥勅以麥木丁所行清潔與

安童治省事五月甲戌以御史中丞郭佑爲中書省
參知政事丁丑減上都商稅戊寅廣平汴梁鈞鄭旱
以遠方曆日取給京師不以時至荆湖等處四行省
所用者隆興印之合刺章河西西川等處所用者京
兆印之詔甘州每地一頃輸稅三石壬午以軍千人
修阿失鹽場倉以忻都爲踢里玉招討使佩虎符有
旨不可興兵遠攻近地有不服者討之右巴等洞蠻
平甲申立汴梁宣慰司依安西王故事汴梁以南至
江以親王鎮之丁亥中書省臣言六部官冗甚可止
以六十八員爲額餘悉汰去詔擇其廉潔有幹局者

存之分漢地及江南所拘弓箭兵器爲三等下等毀
之中等賜近居蒙古人上等貯於庫有行省行院行
臺者掌之無省院臺者達魯花赤畏兀回回居職者
掌之漢人新附人雖居職無有所預戊子改昇江烏
定朶里滅該等府爲路雲南行省臣脫帖木兒言蠲
逋賦徵侵隱戍叛民明黜陟罷轉運給親王賦豪戶
除重稅決盜賊增驛馬取質子定俸祿教農桑優學
者卹死事捕逃亡十餘事命中書省議其可者行之
庚寅真定廣平河間恩州大名濟南蠶災增大都諸
門尉副各一人勅朶兒只招集甘沙速等州流徙饑

民行御史臺復徙于杭州丁酉徙行樞密院於建康
戊戌汴梁懷孟濮州東昌廣平平陽彰德衛輝旱罷
江南造船提舉司陳日烜走海港鎮南王命李恒追
襲敗之適暑兩疫作兵欲北還思明州命唆都等還
烏里安南以兵追躡唆都戰死恒爲後距以衛鎮南
王藥矢中左膝至思明毒發而卒六月庚戌命女直
水達達造船二百艘及造征日本迎風船辛亥揚州
進芝草丙辰遣馬速忽阿里齎鈔千錠往馬八圖求
奇寶賜馬速忽虎符阿里金符高麗遣使來貢方物
庚午詔減商稅罷牙行省市船司入轉運司左丞呂

師變乞假五月省母江州帝許之因諭安童曰此事汝蒙古人不知朕左右復無漢人可否皆自朕決汝當盡心善治百姓無使重困致亂以爲朕羞叅知政事張德潤獻其家人四百戶於皇太子馬湖部田鼠食稼殆盡其總管祠而祝之鼠悉赴水死秋七月壬申造溫石浴室及更衣殿癸酉詔禁捕獵甲戌勅祕書監修地理志乙亥安南降者昭國王武道文義彰憲彰懷四侯赴闕戊寅京師蝗分甘州屯田新附軍三百人田于亦集乃之地己卯以米千石廩覓吉刺貧民壬午陝西四川行中書省左丞汪惟正入見甲

申改闊里吉思等所平大小十谿洞悉爲府州縣修汴梁城丁亥廣東宣慰使月的迷失入覲以所降渠帥郭逢貴等至京師言山寨降者百五十餘所帝問戰而後降邪招之即降邪月的迷失對曰其首拒敵者臣已磔之矣是皆招降者也因言塔木兵後未嘗撫治其民州縣官復無至者故盜賊各據土地互相攻殺人民漸耗今宜擇良吏往治之從之庚寅樞密院言鎮南王脫歡所總征交趾兵久戰力疲請於奧魯赤等三萬戶分蒙古軍千人江淮江西荆湖三行院分漢軍新附軍四千人選良將將之取鎮南王脫

歡阿里海牙節制以征交趾從之復以唐兀帶爲荆湖行省左丞唐兀帶請放征交趾軍還家休憇詔從脫歡阿里海牙處之給諸王阿只吉分地貧民農具牛種令自耕播乙未雲南行省言今年未暇征緬請收獲秋禾先伐羅北甸等部從之庚子改開達梁山三州隸夔州路八月庚子給鈔萬二千四百錠爲本取息以贍甘肅二州屯田貧軍辛丑命有司祭斗三日戊申分四川鎮守軍萬人屯田成都丙辰車駕至自上都已未詔復立泉府司秩從二品以荅失蠻領之初和禮霍孫以泉府司商販者所至官給飲食遣兵防衛民實厭苦不便奏罷之至是荅失蠻復奏立之九月丙寅遣蒙古軍三千人屯田清澹靖海戊辰罷禁海商省合刺章金齒二宣撫司爲一治永昌立臨安廣西道宣撫司中書省臣奏近奉旨括江淮水手江淮人皆能游水恐因此動搖者衆從之罷權酤初民間酒聽自造米一石官取鈔一貫盧世榮以官鈔五萬錠立權酤法米一石取鈔十貫增舊十倍至是罷權酤聽民自造增課鈔一貫爲五貫敕拘銅錢餘銅器聽民仍用令福建黃華畬軍有恆產者爲民無恆產與妻子者編爲守城軍汪惟正言鞏昌軍民站

戶并諸人奴婢因饑歲流入陝西四川者彼即括爲軍站帝曰信如所言當鳩集與之如非已有而強欲得之者豈彼於法不知懼邪乙亥聽民自實兩淮荒地免稅三年中書省以江北諸城課程錢糧聽抗鄂二行省節制道途迂遠請改隸中書從之永昌騰衝二城在緬國金齒間摧圯不可禦敵敕修之勅自今貢物惟地所產非所產者毋輒上丙子真蠟占城貢樂工十人及藥材鱈魚皮諸物辛巳收集工匠之隱匿者丙戌速木都刺馬谷二國遣使來朝庚寅勅征交趾諸軍除留蒙古軍百漢軍四百爲鎮南王脫歡

宿衛餘悉遣還別以江淮行樞密院所總蒙古兵戍江西癸巳雲南貢方物烏蒙叛命四川行院也速帶兒將兵討之馬湖總管汝作以蠻軍三百爲助降西崖門酋長阿者等百餘戶冬十月己亥以鈔五千錠和糴于應昌府復分河間山東鹽課轉運司爲二遣合撒兒海牙使安南遣雪雪的斤領畏兀兒戶一千戌合刺章庚子享于太廟甲辰修南嶽廟乙巳樞密院臣言脫脫木兒遣使言阿沙阿女阿則三部欲叛宜遣人往召如不至乘隙伐之不允因勅諭之事不議於雲南王也先帖木兒者毋輒行詔征東招討使

塔塔兒帶揚兀魯帶以萬人征骨嵬因授揚兀魯帶
三珠虎符爲征東宣慰使都元帥壬子長葛郾城各
進芝草癸丑立征東行省以阿塔海爲左丞相劉國
傑陳巖並左丞洪茶立右丞征日本賜脫里察安答
即古阿散等印令考覈中書省其制如三品丙辰以
叅議帖木兒爲叅知政事位郭佑上且命之曰自今
之事皆責於汝馬法國入貢戊午以江淮行省平章
忙兀帶爲江浙省左丞相初西川止立四路阿合馬
濫用官增而爲九臺臣言其地民少留廣元成都順
慶重慶夔府五路餘悉罷去後以山谷險要蠻夷雜

處復置嘉定路叙州宣撫司以控制之陞大理寺爲
都護府職從二品都護府言合刺禾州民饑戶給牛
二頭種二石更給鈔一十一萬六千四百錠糴米六
萬四百石爲四月糧賑之癸亥以答即古阿散理筭
積年錢穀別置司署與省部敵干擾政務併入省中
丁卯勅樞密院計膠萊諸處漕船高麗江南諸處所
造海船括傭江淮民船備征日本仍勅習泛海者募
水工至千人者爲千戶百人爲百戶塔海第六十言
今百姓及諸投下民俱令造船於女直而女直又復
發爲軍工役繁甚乃頽勝納合兒兩投下鷹坊採金

等戶獨不調有旨遣使發其民烏蒙蠻夷宣撫使阿蒙叛詔止征羅必丹兵同雲南行省出兵討之郭佑言自平江南十年之間九錢糧事八經理筭今答即古阿散等又復鈎考宜即罷去帝嘉納之十一月己巳朔廣東宣慰使月的迷失以英德循梅三路民少請改爲州又請以管軍總管于躍爲惠州總管蔚州知州木八刺爲潮州達魯花赤帝疑其專不允御史臺臣言御史臺按察司以糾察百官爲職近鈎校錢穀者恐發其奸私聚羣不逞之徒欲沮其事願陛下依舊制諭之制曰可庚午賜皇子愛牙赤銀印壬申

以討日本遣阿八刺督江淮行省軍需遣察忽督遼東行省軍需甲戌置合刺章四川建都等驛戊寅遣使告高麗發兵萬人船六百五十艘勦征日本仍令於近地多造船己丑籍重慶府不花家人百二十三戶爲民御史臺臣奏昔宋以無室家壯士爲鹽軍數凡五千今存者一千一百二十二人性習凶暴民患苦之宜給以衣糧使屯田自贍詔議行之癸巳敕漕江淮米百萬石泛海貯於高麗之合浦仍令東京及高麗各貯米十萬石備征日本諸軍期於明年三月以次而發八月會於合浦乙未以禿魯歡爲叅知政

事盧世榮伏誅丙申赦囚徒黥其面及招宋時販私
鹽軍習海道者爲水工以征日本十二月敕減天下
罪囚以占城遁還忽都虎劉九田二復舊職從征日
本增阿塔海征日本戰士萬人回回砲手五十人已
亥從樞密院請嚴立軍籍條例選壯士及有力家充
軍勅樞密院向以征日本故遣五衛軍還家治裝今
悉選壯士以正月一日到京師江淮行省以戰船千
艘習水戰江中辛丑誅答即古阿散黨人蔡仲英李
蹊丁未皇太子薨戊午以中衛軍四千人伐木五萬
八千六百給萬安寺修造己未丹太廟楹乙酉立集

賢院以扎里蠻領之戊子罷合刺章打金規運所及
都元帥勅合刺章酋長之子入質京師千戶百戶子
留質雲南王也先帖木兒所中書省臣奏納速丁言
減合刺章冗官可歲省俸金九百四十六兩又屯田
課程專人主之可歲得金五千兩皆從之遣只必哥
等考覈雲南行省庚寅詔母遷轉工匠官辛卯勅有
司祭北斗是歲命江浙轉運司通管課程集諸路僧
四萬於西京普恩寺作資戒會七日夜併省重慶等
處州縣占城行省叅政亦黑迷失等以軍還駐海外
四州遣使以聞赦放其軍還賜皇子脫歡諸王阿魯

灰只吉不花公主囊家真等鈔計七千七百三十二
錠馬六百二十九匹衣段百疋弓千矢二萬發賜諸
王阿只吉合兒魯忙兀帶宋忽兒阿沙合丹別合刺
等及官戶散居河西者羊馬價鈔三萬七千七百五
十七錠布四千匹絹二千匹以伯八刺等貧乏給鈔
七萬六千五百二錠賞諸王阿只吉小厮汪總帥別
速帶也先等所部及征緬占城等軍鈔五萬三千五
百四十一錠馬八千一百九十七匹羊一萬六千六
百三十四牛十一米二萬二千一百石絹帛八萬一
千匹綿五百三十斤木綿二萬七千二百七十九匹
甲千被弓千張衣百七十九襲命帝師也憐八合失
甲自羅二思八等迺嚴佛事于萬安興教慶壽等寺
凡一十九會斷死罪二百七十一人

本紀卷第十三

本紀卷第十四

元史十四

翰林學士帝太后制誥兼修國史臣宋濂翰林待制承直郎同知制誥兼國史院編修官臣王禕等奉
勅修

世祖十一

二十三年春正月戊辰朔以皇太子故罷朝賀禁賣
金銀銅錢越海互市甲戌帝以日本孤遠島夷重困
民力罷征日本召阿八赤赴闕仍散所顧民船以江
南廢寺土田為人占據者悉付總統楊璉真加修寺
已卯立羅不怯台闡鄺幹端等驛呂文煥以江淮行
省右丞告老許之任其子為宣慰使庚辰馬八國遣

使進銅角壬午太陰犯軒轅太民遣使代祀嶽瀆東海祭未罷鞏昌二十四城拘權所以其事入有司發鈔五千錠糴糧于沙靜隆興從桑哥請命揚璉真加遣宋宗戚謝儀孫全允堅趙沂趙太一入質甲申忽都魯言所部屯曰新軍二百人鑿河渠於亦集乃之地役久功大乞以傍近民西僧餘戶助其力從之愍荅孫遣使言軍士疲乏者八百餘人乞賑贍宜於朶魯朶海處驗其虛實帝曰比遣人往事已緩矣其使贍之丁亥焚陰陽偽書顯明曆辛卯命阿里海牙等議征安南事宜癸巳陞福州長溪縣爲福寧州以福安

寧德二縣隸之丙申以新附軍千人屯田合思罕關東曠地官給農具牛種丁酉畝于近郊降叙州爲縣隸夔夷宣撫司詔禁沮擾鹽課設諸路推官以審刑獄上路二負中路一負陞龍興武寧縣爲寧州以分寧隸之二月己亥勅中外凡漢民持鐵尺手搨及杖之藏刃者悉輸于官辛丑遣使以鈔五千錠賑諸王小薛所部饑民甲辰以雪雪的斤爲緬中行省左丞相阿台董阿叅知政事兀都迷失簽行中書省事以阿里海牙仍安南行中書省左丞相奧魯赤平章政事都元帥烏馬兒亦里迷失阿里督順樊楫並叅知

政事遣使諭皇子也先鐵木兒調合刺章軍千人或
二三千付阿里海牙後征交趾仍具將士姓名以聞
乙巳廷議以東北諸王所部雜居其間宣慰司望輕
罷山北遼東道開元等路宣慰司立東京等處行中
書省以闊闊你敦爲左丞相遼東道宣慰使塔出右
丞同簽樞密院事楊仁風宣慰使亦而撒合並叅知
政事敕中書省太府監所儲金銀循先朝例分賜諸
王復立大司農司專掌農桑陞宣徽院正二品降鎮
巢府爲巢州丁未用御史臺臣言立按察司巡行郡
縣法除使二員留司副使以下每歲二月分蒞按治

十月還司丙午太陰犯井戊申樞密院奏前遣蒙古軍
萬人屯田所獲除歲費之外可糶鈔三千錠乞分廩
諸翼軍士之貧者帝悅令從便行之調京師新附軍
二千立營屯田癸丑復置隰州大寧縣丁巳命湖廣
行省造征交趾海船三百期以八月會欽廉州戊午
併江南行樞密院四處入行省命荆湖占城行省將
江浙湖廣江西三行省兵六萬人伐交趾荆湖行省
平章奧魯赤以征交趾事宜請入覲詔乘傳赴闕集
賢直學士程文海言省院諸司皆以南人叅用惟御
史臺按察司無之江南風俗南人所諳宜叅用之便

帝以語王速鐵木兒對曰當擇賢者以聞帝曰汝漢人用事者豈皆賢邪江南諸路學田昔皆隸官詔復給本學以便教養封陳益稷爲安南王陳秀峻爲輔義公仍下詔諭安南吏民復立岳鄂常德潭州靜江權茶提舉司癸亥太史院上授時曆經曆議敕藏于翰林國史院甲子復以平原郡公趙與芮江南田隸東宮立甘州行中書省丙寅以編地里書名曲阜教授陳灝京兆蕭顛蜀人虞應龍唯應龍赴京師三月己巳御史臺臣言近奉旨按察司叅用南人非臣等所知宜令侍御史行御史臺等程文海與行臺官博采公潔知名之士具以名聞帝命賚詔以往太陰犯婁浚治中興路河渠省雲和署入教坊司辛未降梅循爲下州甲戌雄霸二州及保定諸縣水泛溢冒官民田發軍民築河堤禦之乙亥以麥木丁仍中書右丞與郭佑並領錢穀楊居寬典銓選立欽察衛親軍都指揮使司賜諸王脫忽帖木兒羊二萬丙子大駕幸上都詔行御史臺按察司以八月巡行郡縣中書省臣言阿合馬時諸王駙馬往來餉給之費悉取於萬億庫後徵百官俸入以償最非便詔在籍者除之勿徵以權茶提舉李起南爲江西權茶轉運使起南嘗言

江南茶每引價三貫六伯文今宜增每引五貫事下
中書議因令起南爲運使置達魯花赤處其上丁丑
徙東京行中書省于咸平府癸巳歲星犯壘壁陣以
臨江路爲比安王分邑夏四月庚子中書省臣請立
汴梁行中書省及燕南河東山東宣慰司有旨南京
戶寡盜息不必置省其宣慰司如所請濟南乃勝納
合兒分地太原乃阿只吉分地其令各位委官一人
同治之敕免雲南從征交趾蒙古軍屯田租立烏蒙
站江南諸路財賦並隸中書省雲南省平章納速刺
丁上便宜數事一曰弛道路之禁通民來往二曰禁

負販之徒毋令從征三曰罷丹當站賦民金爲飲食
之費四曰聽民伐木貿易五曰戒使臣勿擾民居立
急遞鋪以省駟騎詔議行之辛丑陝西行省言延安
置屯田鷹坊總管府其火失不花軍逃散者皆入屯
田今復供秦王阿難荅所部阿黑荅思飼馬及輸他
賦有旨皆罷之其不悛者罪當死甲辰行御史臺自
杭州徙建康以山南淮東淮西三道按察司隸內臺
增置行臺色目御史員數丁未江東宣慰司進芝一
本庚戌制謚法壬子樞密院納速刺丁言前所統漸
丁軍五千人徃征打馬國其力已疲今諸王復籍此

軍征緬宜取進止帝曰苟事力未損即遣之仍諭納
速刺丁分阿刺章蒙古軍千人以能臣將之赴交趾
助皇子脫歡已未遣要束木勾考荆湖行省錢穀中
書擬要束木平章政事脫脫忽叅知政事有旨要束
木小人事朕方五年授一理筭官足矣脫脫忽人奴
之奴令史宣使才也讀卿等所進擬令人耻之其以
朕意諭安童以漢民就食江南者多又從官南方者
秩滿多不還遣使盡徙北還仍設脫脫禾孫於黃河
江淮諸津渡凡漢民非賫公文適南者止之為商者
聽中書省臣言比奉旨凡為盜者毋釋今竊鈔數貫

及佩刀微物與童幼竊物者悉令配役臣等議一犯
者杖釋再犯依法配役為宜帝曰朕以漢人徇私用
泰和律處事致盜賊滋衆故有是言人命至重今後
非詳讞者勿輒殺人五月丁卯朔樞密院臣言臣等
與王速帖木兒議別十八里軍事凡軍行並聽伯顏
節制其留務委孛藥帶及諸王阿只吉官屬統之為
宜從之己巳熒惑犯太微西垣上將荆湖行省阿里
海牙上言要束木在鄂省勾考豈無貪賄臣亦請勾
考之詔遣叅知政事禿魯罕樞密院判李道治書侍
御史陳天祥偕行甲戌汴梁旱徙江東按察司于宣

州庚辰歲星犯壘壁陣乙酉熒惑犯太微右執法勅
遣耽羅戍兵四百人還家庚寅廣平等路蠶災辛卯
霸州灤州蝻生安南國遣使來貢方物癸巳京畿旱
六月丙申朔太白犯御女辛丑中書省臣言禿魯罕
來奏前要東木阿里海牙互請鉤考今阿里海牙雖
已死事之是非當令暴白帝曰卿言良是其連引諸
人近者即彼追逮遠者宜以上聞此事自要東木所
發當依其言究行之乙巳以立大司農司詔諭中外
皇孫鐵木兒不花駐營亦奚不薛其糧餉仰於西川
遠且不便徙駐重慶府詔以大司農司所定農桑輯
要書頒諸路命雲南陝西二行省籍定建都稅賦戊
申括諸路馬凡色目人有馬者三取其二漢民悉入
官敢匿與互市者罪之辛亥以亦馬刺丹忒忽里使
交趾癸丑湖廣行省線哥言今用兵交趾分本省戍
兵二萬八千七百人期以七月悉會靜江今已發精
銳啓行餘萬七千八百人皆羸病屯田等軍不可用
敕今歲姑罷之丁巳設陝西等路諸站總管府從三
品庚申甘肅新招貧民百一十八戶敕廩給之敕路
府州縣捕盜者持弓矢各路十副府州七副縣五副
以薛閣干爲中書省平章政事辛酉封楊邦憲妻田

氏爲永安郡夫人領播州安撫司事遣鎮西平緬等
路招討使怯烈招諭緬國廣元路閬中麥秀兩岐高
麗國遣使來貢秋七月丙寅朔遣必刺蠻等使爪哇
已巳用中書省臣言以江南隸官之田多爲強豪所
據立營田總管府其所據田仍履畝計之復尚醞監
爲光祿寺罷遼陽等處行中書省復北京咸平等三
道宣慰司給鐵古思合敦貧民幣帛各二千布千匹
庚午江淮行省忙兀帶言今置省杭州兩淮江東諸
路財賦軍實皆南輸又復北上不便揚州地控江海
宜置省宿重兵鎮之且轉輸無往返之勞行省徙揚
州便從之立淮南洪澤芍陂兩處屯田壬申平陽饑
民就食隣郡者所在發倉賑之置中尚監右丞拜荅
兒將兵討阿蒙并其妻子禽之皆伏誅丁丑幹脫吉
思部民饑遣就食北京其不行者發米賑之以雄易
二州復隸保定給和林軍儲自京師輸米萬石發鈔
即其地糶米萬石辛巳八都兒饑民六百戶駐八刺
忽思之地給米千石賑之壬午總制院使桑哥具省
臣姓名以上帝曰右丞相安童右丞麥朮丁叅知政
事郭佑楊居寬並仍前職以鐵木兒爲左丞其左丞
相斄吉刺帶平章政事阿必失合忽都魯皆別議仍

諭中書選可代者以聞給金齒國使臣圓符祭已銓
定省院臺部官詔諭中外中書省除中書省令外左右
丞相並二員平章政事二員左右丞並一員叅知政
事二員行中書省平章政事二員左右丞並一員叅
知政事簽行省事並二員樞密院除樞密院使外同
知樞密院事一員樞密院副使簽樞密院事並二員
樞密院判一員御史臺御史大夫一員中丞侍御史
治書侍御史並二員行臺同六部尚書侍郎郎中員
外郎並二員其餘諸衙門並委中書省斟酌裁減八
月丙申發鈔二萬九千錠鹽五萬引市米賑諸王阿
只吉所部饑民己亥敕樞密院遣侍衛軍千人扈從
北征平陽路歲比不登免貧民稅賦罷淮東蘄黃宣
慰司以黃蘄壽昌隸湖廣行省安慶六安光州隸淮
西宣慰司招集宋鹽軍以市舶司隸泉府司乙卯太
白犯軒轅右角辛酉婺州永康縣民陳巽四等謀反
伏誅甘州饑禁酒罷德平定昌二路置德昌軍民總
管府九月乙丑朔馬八兒須門那僧急里南無力馬
蘭丹那旺丁呵兒來來急闌亦帶蘇木都刺十國各
遣子弟上表來覲仍貢方物以太廟雨壞遣筮吉刺
帶致告奉安神主別殿甲申太陰犯天關壬辰高麗

遣使獻日本俘是月南部縣生嘉禾一莖九穗芝產于蒼溪縣冬十月甲午朔太白犯右執法以南康路隸江西行省徙淞西按察司治杭州罷諸道提刑按察司判官行御史臺監察御史及按察司官雖漢人並毋禁弓矢襄邑縣尹張玘爲治有績鄒平縣達魯花赤回回能捕盜理財進秩有差丁酉享于太廟戊戌太陰犯建星己亥車駕至上都壬寅太白犯左執法遣兵千人戌畏吾境乙巳賜合迷里貧民及合刺和州民牛種給鈔萬六千二百錠當其價合迷里民加賜幣帛並千匹己酉遣塔塔兒帶楊兀魯帶以兵萬人船千艘征骨嵬中書省具宣徽大司農大都上都留守司存減負數以聞帝曰在禁近者朕自沙汰餘從卿等議之辛亥太陰犯東井河決開封祥符陳留杞太康通許鄆陵扶溝洧川尉氏陽武延津中牟原武睦州十五處調南京民夫二十萬四千三百二十三人分築隄防癸丑諭江南各省所統軍官教練水軍遣侍衛新附兵千人屯田別十八里置元帥府即其地總之甲寅太白犯進賢以征緬功調招討使張萬爲征緬副都元帥也先鐵木兒征緬招討司達魯花赤千戶張成征緬招討使並虎符敕造戰船

將兵六千人以征緬俾禿滿帶爲都元帥總之乙卯
給皇子脫歡馬四千匹部曲人三匹庚申濟寧路進
芝二莖壬戌改河間鹽運司爲都轉運使司徒戌廿
州新附軍千人屯田中興千人屯田亦里黑高麗遣
使來獻日本俘十六人馬法國進鞍勒羶甲輿化路
仙游縣蟲傷禾十一月乙丑中書省臣言朱清等海
道運糧以四歲計之總百一萬石斗斛耗折願如數
以償風浪覆舟請免其徵稅之遂以昭勇大將軍公
海招討使張瑄明威將軍管軍萬戶兼管海道運糧
舩朱清並爲海道運糧萬戶仍佩虎符敕禽獸字孕
時無畋獵戊辰太白犯亢遣蒙古千戶曲出等總新
附軍四百人屯田別十八里己巳改思明等四州並
爲路以阿八赤爲征交趾行省右丞丙子以涿易二
州良鄉寶坻縣饑免今年租給糧三月平灤太原汴
梁水旱爲災免民租二萬五千六百石有奇改廣東
轉運市舶提舉司爲鹽課市舶提舉司丁丑命塔義
兒忽難使阿兒渾戊寅遣使閱實宣寧縣饑民周給
之己卯太陰犯井辛巳歲星犯壘壁陣十二月乙未
遼東開元饑賑糧三月戊戌太白犯東咸癸卯要東
木藉阿里海牙家貲運致京師賜諸王木伯所部軍

五千人銀萬五千兩鈔三千錠探馬赤二千人羊七萬口丙午置燕南河東山東三道宣慰司罷大有署丁未太陰犯井乙卯諸道宣慰司在內地者設官四員江南者六員以阿里海牙所莒逃民無主者千人屯田遣中書省斷事官禿不申復鉤考湖廣行省錢穀復置泉州市舶提舉司大都饑發官米低其價糶貧民丙辰遣蒲昌赤貧民墾甘肅閑田官給牛種農具賜安南國王陳益稷羊馬鈔百錠丁巳太陰犯氏戊午翰林承旨撒里蠻言國史院纂脩太祖累朝實錄請以畏吾字繙譯俟奏讀然後纂定後之諸路分

置六道勸農司庚申置尚珍署於濟寧等路秩從五品是歲以亦攝思憐爲帝師賜皇子奧魯赤脫歡諸王木伯也不干等羊馬鈔一十五萬一千九百二十三錠馬七千二百九十四匹羊三萬六千二百六十九口幣帛毳段木綿三千二百八十八匹貂裘十四又賜皇子脫歡所部憐牙思不花等及欠州諸局工匠鈔五萬六千一百三十九錠一十二兩命西僧迺作佛事于萬壽山玉塔殿萬安寺凡三十會大司農司上諸路學校凡二萬一百六十六所儲義糧九萬五百三十五石植桑棗雜菓諸樹二千三百九萬四千

六百七十二株斷死刑百一十四人

二十四年春正月乙丑復雲南石梁縣戊辰以修築

柳林河堤南軍三千浚河西務漕渠皇子奧魯赤部

曲饑命大同路給六十日糧免唐兀衛河西地元籍

徭賦壬申御正殿受諸王百官朝賀癸酉俱藍國遣

使不六溫乃莽來朝甲戌太陰犯東井乙酉太陰犯

房丙戌以叅政程鵬飛為中書右丞阿里為中書左

丞丁亥以不顏里海牙為叅知政事發新附軍千人

從阿八赤討安南弛女直水達達地弓矢之禁復改

江浙省為江淮行省戊子以鈔萬錠賑幹端貧民西

邊歲饑民困賜絹萬匹庚寅遣使代祀嶽瀆后土東

海辛卯以淮東淮西山南三道按察司隸行御史臺

立上林署秩從七品詔發江淮江西湖廣三省蒙古

漢券軍及雲南兵及海外四州黎兵命海道運糧萬

戶張文虎等運糧十七萬石分道以討交趾置征交

趾行尚書省奧魯赤平章政事烏馬兒樊楫叅知政

事總之並受鎮南王節制二月壬辰朔遣使持香幣

詣龍虎閣皂三茅設醮召天師張宗演赴闕癸巳雍

古部民饑發米四千石賑之不足復給六千石米價

甲午改于近郊乙未以麥木丁為平章政事真定路

元本卷第十四 十三
饑發沁河倉粟減價糶之以真定所牧官馬四萬餘
匹分牧他郡禁畏吾地禽獸孕孳時畋獵庚子太陰
犯天關辛丑太陰犯東井甲辰陞江淮行大司農司
事秩二品設勸農營田司六秩四品使副各二員隸
行大司農司以范文虎爲中書右丞商議樞密院事
壬子封駙馬昌吉爲寧濮郡王設都總管府以總皇
子北安王民匠斡端大小財賦中書省臣言自正旦
至二月中旬費鈔五十萬錠臣等無總財賦自今侍
臣奏請賜脊乞令臣等預議帝曰此朕所常慮仍諭
王速鐵木兒月赤徹兒知之丙辰馬八兒國貢方物

戊午敕諸王闍里鐵木兒節制諸軍以趙與芮子孟
桂襲平原郡公乃顏遣使徵東道兵諭闍里鐵木兒
毋輒發閏二月癸亥太陰犯辰星以女直水達達部
連歲飢荒移粟賑之仍盡免今年公賦及減所輸皮
布之半以宋畬軍將校授管民官散之郡邑救春秋
二仲月上丙日記堯帝祠西京等處管課官馬合謀
自言歲以西京平陽太原課程額外羨錢市馬駝千
輸官而實盜官錢市之按問有跡伏誅乙丑畋于近
郊召麥木丁鐵木兒楊居寬等與集賢大學士阿魯
渾撒里及葉李程文海趙孟頫論鈔法麥木丁言自

制國用使司改尚書省頗有成效今仍分兩省爲便
詔從之各設官六員其尚書以桑哥鐵木兒平章政
事阿魯渾撒里右丞葉李左丞馬紹叅知政事餘一
員議選回回人充中書宜設丞相二員平章政事二
員叅知政事二員省隴右河西道提刑按察司分置
鞏昌者入甘州設官五員以鞏昌改隸京兆提刑按
察司設官六員省太原提刑按察司分置西京者入
太原辛未以復置尚書省詔天下除行省與中書議行餘並
聽尚書省從便以聞設國子監止國學監官祭酒一
員司業二員監丞一員學官博士二員助教四員生

員百二十人蒙古漢人各半官給紙劄飲食仍隸集
賢院設江南各道儒學提舉司甲申太陰犯牽牛車
駕還宮乙酉改淄萊路爲般陽路置錄事司大都饑
免今歲銀俸鈔諸路半徵之罷江南竹木柴薪及岸
例魚牙諸課停不給之務敕行省宣慰司勿濫舉官
吏受除官延引歲月不即之任者追所受宣勅鎮南
王脫歡徙鎮南京改福建市舶都漕運司爲都轉運
鹽使司范文虎改尚書右丞商議樞密院事改行中
書省爲行尚書省六部爲尚書六部以吏部尚書忻
都爲尚書省叅知政事庚寅大駕幸上都札魯忽赤

合刺合孫等言去歲審囚官所錄囚數南京濟南兩路應死者已一百九十人若總校諸路為數必多宜留札魯忽赤數人分道行刑帝曰囚非群羊豈可遽殺耶宜悉配隸淘金三月甲午更造至元寶鈔頒行天下中統鈔通行如故以至元寶鈔一貫文當中統交鈔五貫文子母相權要在新者無冗舊者無廢凡歲賜周乏餉軍皆以中統鈔為准禁無藉自効軍擾民仍籍克軍丙申太陰犯東井乙卯辛涼陞遼東饑弛太子河捕魚禁丙辰馬八兒國遣使進奇獸一類騾而巨毛黑白間錯名阿塔必即降重慶路定遠州

為縣命都水監開汶泗水以達京師汴梁河水泛溢役夫七千修完故堤夏四月癸酉太陰犯氐甲戌太陰犯房甲申忻都奏發新鈔十一萬六百錠銀千五百九十三錠金百兩付江南各省與民互市是月諸王乃顏反五月己亥遣也先傳旨諭北京等處宣慰司允隸乃顏所部者禁其往來毋令乘馬持弓矢庚子以不魯合罕總探馬赤軍三千人出征移濟南宣慰司治益都燕南按察司治大名南京按察司治南陽太原按察司治西京復立豐州亦刺真站壬寅以御史臺吏王良弼等誹訕尚書省政事誅良弼籍其

家餘皆斷罪用桑哥言置上海福州兩萬戶府以維制沙不丁烏馬兒等海運船戶工兩部各增尚書二員授高麗王昉行尚書省平章政事罷諸路站脫脫禾孫括江南諸路匠戶沙不丁言江南各省南官多每省宜用一二人帝曰除陳巖呂師夔管如德范文虎四人餘從卿議帝自將征乃顏發上都括江南僧道馬匹詔范文虎將衛軍五百鎮平灤以欽察爲親軍都指揮使也速帶兒右衛僉事王通副之甲辰免北京今歲絲銀仍以軍旅經行給鈔三千錠賑之壬子高麗王昉請益兵征乃顏以五百人赴之六月庚

申朔百官以職守不得從征乃顏願獻馬以給衛士壬戌至撒兒都魯之地乃顏黨塔不帶率所部六萬逼行在而陣遣前軍敗之乙丑救遼陽省督運軍儲壬申發諸衛軍萬人蒙古軍千人戍豪懿州諸王失都兒所部鐵哥率其黨取咸平府渡遼欲劫取豪懿州守臣以乏軍求援敕以北京戍軍千人赴之括平灤路馬北京饑免絲銀租稅乙亥霸州益津縣霖雨傷稼以陝西涇邠乾及安西屬縣閑田立屯田總管府置官屬秩三品車駕駐于大利幹魯脫之地獲乃顏輜重千餘仍禁秋毫無犯秋七月癸巳乃顏黨失都

元史本紀卷第十四 十七
兒犯咸平宣慰塔出後皇子愛牙亦合兵出瀋州進
討宣慰亦兒撒合分兵趣懿州其黨悉平丁酉弘州
匠官以天兔毛製如西錦者以獻授匠官知弘州戊
戌太陰犯南斗樞密院奏簽征緬行省事合撒兒海
牙言比至緬國諭其王赴闕彼言鄰番數叛未易即
行擬遣阿難荅刺奉表賫土貢入覲辛丑太陰犯牽牛
壬寅熒惑犯輿鬼庚戌雲南行省愛魯言金齒酋打
奔等兄弟求內附且乞入覲壬子太陰犯司怪癸丑
日暈連環白虹貫之罷乃顏所署益都平瀨也不干
河間分地達魯花赤及勝納合兒濟南分地所署官

移北京道按察司置豪州免東京等處軍民徭賦陞
福建鹽運使司依兩淮等例爲都轉運使司以中興
府隸甘州行省以河西管牙赤所部屯田軍同沙州
居民修城河西瓜沙等處立閣鄠屯田八月癸亥太
白犯亢瀋州進瑞麥一莖九穗乙丑車駕還上都以
李海刺孫爲征緬行省叅政將新附軍五千探馬赤
軍一千以行仍調四川湖廣行省軍五千赴之召能
通白夷金齒道路者張成及前占城軍總管劉全並
爲招討使佩虎符從征以脫滿荅兒爲都元帥將四
川省兵五千赴緬省仍令其省駐緬近地以俟進止

置江南四省交鈔提舉司己巳謫從叛諸王赴江南
諸省從軍自效諭鎮南王脫歡禁戢從征諸王及省
官奧魯赤等毋縱軍士焚掠毋以交趾小國而易之
癸酉朶兒朶海獲叛王阿赤思赦之亦集乃路屯田
總管忽都魯請疏浚管內河渠從之丙子填星南犯
壘壁陣已卯太陰犯天關辛巳太陰犯東井甲申太
白犯房丁亥瀋州饑又經乃顏叛兵蹂踐免其今歲
絲銀租賦以北京伐木三千戶屯田平灤立豐贍昌
國濟民三署秩五品設達魯花赤令丞直長各一員
女人國貢海人置河西務馬站九月辛卯東京詎靜

麟威遠婆娑等處大霖雨江水溢沒民田大定金源
高州武平興中等處霜雹傷稼丁酉熒惑犯長垣己
亥湖廣省臣言海南瓊州路安撫使陳仲達南寧軍
總管謝有奎延攔總管符庇成以其私船百二十艘
黎兵千七百餘人助征交趾詔以仲達仍為安撫使
佩虎符有奎庇成亦仍為泐海管軍總管佩金符庚
子太白犯天江給諸王八八所部窮乏者鈔萬一千
錠禁市毒藥者以西京平灤路饑禁酒乙巳太陰犯
畢以米二萬石羊萬口給阿沙所統唐兀軍丁未安
南國遣其中大夫阮文彥通侍大夫黎仲謙貢方物

元史卷之四十四
二十九
戊申咸平懿州北京以乃顏叛民廢耕作又霜雹爲
災告饑詔以海運糧五萬石賑之辛亥熒惑犯太微
西垣上将壬子太白犯南斗禁沮撓江南茶課高麗
王王瞻來朝冬十月戊午朔日有食之壬戌太陰犯
牽牛大星甲子享于太廟桑哥請賜葉李馬紹不忽
木高翥等鈔詔賜李鈔百五十錠不忽木紹翥各百
錠又言中書省舊在大內前阿合馬移置於北請仍
舊爲宜從之癸酉江西行院月的迷失言廣東窮邊
險遠江西福建諸寇出沒之窟乞於江南諸省分軍
一萬益臣詔江西忽都帖木兒以軍五千付之丙子

誅郭佑楊居寬戊寅桑哥言北安王王相府無印而
安西王相獨有印實非事例乞收之諸王勝納合兒
印文曰皇姪貴宗之寶寶非人臣所宜用因其分地
改爲濟南王印爲宜皆從之從總帥汪惟和言分所部
戍四川軍五千人屯田六盤乙酉熒惑犯左執法立
陝西寶鈔提舉司羅北甸土官火者阿禾及維摩合
刺孫之子並內附丙戌范文虎言豪懿東京等處人
心未安宜立省以撫綏之詔立遼陽等處行尚書省
以薛闡千闡里帖木兒並行尚書省平章政事洪茶
丘右丞亦兒撒合左丞楊仁風阿老瓦丁並叅知政

事十一月壬辰大白犯壘壁陣月暈金土二星雲南
省右丞愛魯兵次交趾木兀門其將昭文王以四萬
人守之愛魯擊破之獲其將黎石何英弛太原保德
河魚禁以桑哥爲金紫光祿大夫尚書右丞相兼統
制院使領功德使司事後桑哥請以平章帖木兒代
其位右丞阿剌渾撒里陞平章政事葉李陞右丞叅
知政事馬紹陞左丞陞集賢院秩正二品丙申熒惑犯
太微東垣上相丁酉桑哥言先是皇子忙哥刺封安西
王統河西土番四川諸處置王相府後封秦王綰二
金印今嗣王安難荅仍襲安西王印第按攤不花別

用秦王印其下復以王傳印行一藩而二王恐於制
非宜詔以阿難荅嗣爲安西王仍置王傳而上秦王
印按攤不花所署王傳罷之戊戌以別十八里漢軍
及新附軍五百人屯田合迷玉速曲之地己亥鎮南
王次思明程鵬飛與奧魯赤等從鎮南王分道並進
阿八赤以萬人爲前鋒庚子太白晝見大都路水賜
今年田租十二萬九千一百八十石辛丑烏馬兒焚
楫及程鵬飛等遂趨交趾所向克捷改衛尉院爲太
僕寺秩三品仍隸宣徽以月赤徹兒禿禿合領之丙
午鎮南王次界河交趾發兵拒守前鋒皆擊破之己

酉詔議弭盜桑哥王速帖木兒言江南歸附十年盜賊迄今未靖者宜降旨立限招捕而以安集賁州縣之吏其不能者黜之葉李言臣在漳州十年詳知其事大抵軍官嗜利與賊通者尤難弭息宜令各處鎮守軍官例以三年轉徙庶革斯弊帝皆從其議詔行之封駙馬帖木兒濟寧郡王壬子以江西行省平章忽都帖木兒督捕廣東等處盜賊甲寅命京畿濟寧兩漕運司分掌漕事鎮南王次萬劫諸軍畢會獲福建首賊張治因其黨皆平諭江南四省招捕盜賊丙辰熒惑犯進賢十二月癸亥立尚乘寺順元宣慰使

禿魯古言金竹寨主搔驢等以所部百二十五寨內附甲子皇子北安王置王傳九軍需及本位諸事並以王傳領之丙寅太陰犯畢太白晝見丁卯減揚州省歲額米十五萬石以鹽引五十萬易糧免浙西魚課三千錠聽民自漁發河西甘肅等處富民千人往闡鄠地與漢軍新附軍雜居耕植從安西王阿難荅請設本位諸匠都總管府陞萬億庫官秩四品癸酉鎮南王次茅羅港攻浮山寨破之諸王薛徹都等所駐之地雨土七晝夜羊畜死不可勝計以鈔暨幣帛綿布雜給之其直計鈔萬四百六十七錠丁丑以朱

清張瑄海漕有勞遙授宣慰使乙酉鎮南王以諸軍
渡富良江次交趾城下敗其守兵日烜與其子棄城
走敢喃堡是歲命西僧監感宛卜卜思哥等作佛事
坐靜于大殿寢殿萬壽山五臺山等寺凡三十三會
斷天下死刑百二十一人浙西諸路水免今年田租
十之二西京北京隆興平灤南陽懷孟等路風雹害
稼保定太原河間般陽順德南京真定河南等路霖
雨害稼太原尤甚屋壞壓死者衆平陽春旱二麥枯
死秋種不入土鞏昌雨雹蚘蚋爲災分賜皇子諸王
駙馬怯薛帶等羊馬鈔總二十五萬三千五百餘錠
又賜諸王怯薛帶等軍人馬一萬二千二百羊二萬
二千六百駝百餘賑貧乏者合刺忽荅等鈔四萬八
千二百五十錠

本紀卷第十四

西

#9562
3030

三十三

本報館在廣州沙面...
 電話...
 地址...

中國實業

第九卷 第九期
 中華民國二十九年九月九日
 第九卷 第九期

要目

國民政府... (張謇)	中央黨部... (張謇)	交通部... (張謇)	教育廳... (張謇)
財政部... (張謇)	農林部... (張謇)	工商部... (張謇)	交通銀行... (張謇)
交通銀行... (張謇)	交通銀行... (張謇)	交通銀行... (張謇)	交通銀行... (張謇)

(定價)

時論旬刊

旬刊 第九期 第九卷
 主編：張謇
 編輯：張謇
 發行：張謇
 地址：廣州沙面

市立教育民光中學招生通告
 本校經教育部備案立案，現已正式開課，招收新生。校址：恩園路膠州路。

中央黨部東花崗中學招生通告
 本校經教育部備案立案，現已正式開課，招收新生。校址：東花崗。

中華會計學校
 招生通告：本校設有會計、簿記、珠算等科，現已開學。

東亞體育專科學校
 附屬體育師範，招收童子軍教練班。校址：東亞路。

慈航高級助產職業學校
 續招新生。校址：慈航路。

國立戲劇學校
 招生通告：本校設有表演、導演、編劇等科，現已開學。

浙江省電話局會計練習員通告
 招考練習員，報名日期：九月十日，考試日期：九月十七日。

中心行通告
 本行經理：石礦廠、各種滑石、筆、鉛、礦。地址：松江蘇同濟筆鉛廠。

考試院圖書館招標廣告
 本院圖書館擬造鋼鐵架，招標日期：九月廿五日到院當標。

交通部購料委員會招標通告
 招標通告：交通部購料委員會擬購各項材料，招標日期：九月廿五日到院當標。

公安局建築警察公墓招工投標通告
 招標通告：公安局擬建築警察公墓，招標日期：九月廿五日到院當標。

交通部國際電信局青島吳淞海岸電台房屋工程招標通告
 招標通告：交通部國際電信局擬修青島吳淞海岸電台房屋工程，招標日期：九月廿五日到院當標。

國債基金管理委員會廿四年八月份基金收支報告

一、基金總額	九百九十九萬九千九百九十九元	二、基金總額	九百九十九萬九千九百九十九元
三、基金總額	九百九十九萬九千九百九十九元	四、基金總額	九百九十九萬九千九百九十九元
五、基金總額	九百九十九萬九千九百九十九元	六、基金總額	九百九十九萬九千九百九十九元